

APOCALIPSIS

Tupana i'imaká Jesucristojlo mékeka nakaje i'imajika akijñojo yukuna marí

1 ¹Tupana a'arí pu'uwaká Jesucristojlo nakaje akijñojo i'imajíkare, ra'apátakaloje riyukuna weká rijwa'até jápajeñojlo. Raú Jesucristo wakára'a pajluwaja Tupana wa'atéjeri, je'echú chiyaje, riyukuna i'imajé nuká Juanjlo. ²Kewaka marí yuku, Tupana puráka'alo riká, rikoja Jesucristo ja'apátakale nojló ri'imaká. ³Palá Tupana la'ajika pura'ajeño marí puráka'aloji lana'akéjami wa'até nakú; palá kaja rila'ajika a'ajeño nanakojó ripuráka'alo. Palani ra'apiyá jema'akana, ri'imajíkale marí puráka'aloji kemaká ke. Meketana i'imajemi ri'imajé ñaké.

Juan wakára'ari Jesucristo ja'apiyá jema'ajeñojlo marí puráka'aloji i'imaká

⁴Nuká Juan wakára'ari ijlo marí puráka'aloji. Asia te'eré e re iyamá kuwá'ata kele (7) ile'ejé awakáka'alo ñakarelana apú ewá, apú ewá, ke. Piyukeja richojé awakájeñojlo nuwakára'a marí puráka'aloji. Nuwata Tupana la'aká ipechu palá. Rijwa'até jápajeri nuká. Nuwata i'imaká palá ripalamane aú. Júpimi wani eyá i'imaká, Tupana; ñakeja riká me'etení; ñakeja kaja ri'imajika maáreya watukumá. Re Ripechu, Tupana i'imaká e kaja riká. Iyamá kuwá'ata kele ripalamane. Nuwata rila'aká iká palá; ⁵nuwata kaja Jesucristo la'aká iká palá. Kewaka ripuráka'alo ra'apátakare ina'ukejlo. Rila'á kaja piyuke nakaje Tupana wakára'aka ke. Ajopana kaja taka'akaño tukumá rimakápo'o i'imaká. Ina'uké wakára'ajeño, marí eja'awá chu i'imakaño, chaje riká. Íki'ija wani Jesucristo wátaka weká, ñakele ritaka'a wachaya a'awaná apiyákakanami nakojé i'imaká. Re kajrú rira i'ijnaká itapuwa aphumi chiyá. Ripalamane aú rila'á weká unká pu'uwaré la'ajeño ke kalé rijló. ⁶Íki'ija Jesucristo wátaka weká. Ritaka'akale wachaya, we'emaó pu'uwaré la'akana liyá,

we'emaká piyá pu'uaré la'akana nakuja. Ñakele piyuke weká pura'año Tupana, Jesucristo jara'apá, wa'até ajopana chaya. Palá wapura'ajiko Jesucristo nakú ñakeja wani. Unká rácho'olajo ina'uké wakára'ajeri i'imakana chiyá, ilé keja ri'imajika.

⁷ Jesucristo pa'ajiko majó wakajé,
piyukeja ina'ukena, eja'awá chuwa i'imakaño,
amájika riwitúka'aka majó juni juwáka'ala e'iyowá;
noño ri'imaká wa'ató amájeño riwitúka'aka majó.
Riwakajé kajrú neyájika.
Ilé ke ri'imajika.

⁸ Piyuke nakaje la'ajeri Tupana. Rimá rinakuwá imaká: “Piyukeja nakaje keño'ótajeri nuká; piyukeja nakaje tajátajeri kaja nuká”.

Júpimi wani eyá i'imaká, Tupana; ñakeja riká me'etení; ñakeja kaja ri'imajika maáreya watukumajo.

⁹ Nuká Juan lana'arí ijló marí. Wejena ke weká pajwa'atéchaka, Jesucristo ja'apiyá jema'ajeño waja we'emakale. Rijwa'atéjena we'emakale, ajopana la'año weká chapú. Ilé kaje aú Jesucristo la'arí wapechu kaphí, wayurika piyá ra'apiyá jema'akana, wajña'akáloje chapú kaje yajwé panaku. No'opátakale ajopánajlo Tupana puráka'alo, Jesucristo kemakare nakú nojló, jimaje nawa'a nu'umaká tejmuji aú paranakuwa Patmos ejo.

¹⁰ Chuwa nu'umajika ijló nakaje pu'uwaká nomákare i'imaká yukuna. Watána'akaje wakajé i'imari riwakajé, e Tupana Pechu ja'aró nunakojé, rejéchami noma'aká pajluwa pura'akó nuyámojo. Mejrí wani ripuráka'alo mejé i'imaká. Luwiluwí chojé iná apho'oká, ke rimejé i'imaká.

¹¹ E rimá nojló: “Pilana'a papeera chojé nakaje pamájikare me'etení yukuna. Rejomi piwakára'aje riká iyamá kuwá'ata kele nawaká'alo ñakarelana, Asia te'eré nakú i'imakare, chiyájenajlo. Re riká Éfeso, Esmirna, Pérgamo, Tiatira, Sardis, Filadelfia eyá, Laodicea kele e. Rejo piwakára'aje najló nakaje pamájikare yukuna”.

¹² Ilé ke noma'aká rimaká aú, nupajno'ó nuyámojo yaká'ajo, nomákaloje naka pura'akó nujwa'até. Nuyaka'o, amari iyamá kuwá'ata kele jepé kaje lukúna'akejami lapa'akó. Oro nakiyá la'akanami waja ripatajona i'imaká. ¹³ Re'iyá nomá kaja pajluwa ina'uké tára'ako. Ina'uké i'imakáloje ripalamane penaje i'imakare ke ramako. Waphereni ra'arumaká i'imaká; chítaje kaja riwachaphila i'imaká, mapíra'aro ri'ikú chuwa rinaku, oro pataró rinaku. ¹⁴ Jareni riwilá amako, juni juwáka'ala jareni wani ke. Kera'athani ke rijlú amako. ¹⁵ Sereni ri'imá amako, pejr'u'uwá

sereni jewani luwa'akeja, nawicho'okare kera'athani ima'aní aú, nala'akáloje riká kapiluni penaje, ke ramako. Eyá rinúrupi mejé jema'aró kajruni wani jipa mejé ke. ¹⁶Riyáthe'ela ka'añá aú ripatá iyamá kuwá'ata kele iwijrina. Rinuma chiyá nomá kaja jajalu kaje jácho'oko, iyámojo pumitanó irerí, pu'uwení wani ramako. Nomá kaja rijimá moko'oká, kamú pataká kaphí wani ke.

¹⁷Nomaka riká ejéchami, no'okó ri'imá nakojé matámiru ke. E rito'otá riyáthe'ela ka'añá nunakojé, rimá nojló: “Pikero'oniño, matajnako i'imajika nuká. Piyuke nakaje keño'ótajeri nuká; piyuke nakaje tajátajeri kaja nuká. ¹⁸Kajmuni nuká. Nutaka'á i'imaká e'iyonaja, chuwa kajmuni nuká, ñakeja nu'umajika matajnako. Tupana a'arí nuká, nu'umatákalaje no'opiyá jema'ajeño kapichákajo liyá. Ra'á kaja nuká nuwakára'akaloje unká jema'alaño no'opiyá nawajákelana ejo. ¹⁹Pilana'á nakaje waje pamíchaje, nakaje pamájikare meketánaja i'imajemi wa'ató. ²⁰Marí ke kemakana iyamá kuwá'ata kele iwijrina jenami pamíchaje nukapi: No'opiyá jema'ajeño awakáka'alo ñakarelana chiyá wakára'ajeño ke neká. Eyá iyamá kuwá'ata kele jepé kaje lapi'ichajo pamíchaje: Iyamá kuwá'ata kele no'opiyá jema'ajeño awakáka'alo ñakarelana, Asia te'eré nakú i'imakare, ke riká”.

Puráka'aloji riwakára'akare pajimila Éfeso e i'imakáñojlo marí

2 ¹Rimá nojló: “Pilana'á marí ke no'opiyá jema'ajeño wakára'ajeri Éfeso e i'imakárejlo: No'opiyá jema'ajeño awakáñoño iyamá kuwá'ata kele nawakáka'alo ñakarelana i'imakare chojé nate'eré ewá. Najwa'até nuká. Richiyá wakára'ajeño, nujwa'atájena waja neká. Ñakele numá marí ke Éfeso e i'imakáño nakú: ²Nuwe'epí palá ila'akare nakojé. Nuwe'epí kaja ijápaka kajrú, ila'akáloje nakaje nuwátaka ke. Re ina'uké nakiyana kemaño nanakuwá mapeja: “Tupana nakú jewíña'atajeño weká’, ke. Kaja iwe'epí mékajenaka neká, raú iwe'epí unká ñaké kalé neká. Pajlákachina neká. ³Jema'akale palá no'opiyá, nala'á iká chapú ilérowa i'imaká e'iyonaja, unká jácho'olo no'opiyá jema'akana chiyá raú. ⁴E'iyonaja kalé ila'á marí ke, unká nuwátalare kaje: Ikeño'oká no'opiyá jema'akana i'imaká wakajé, íki'ija iwátaka nu'umaká. Eyá me'etení, unká ñaké kalé iwátaka nuká. ⁵Iwe'epí na aú ka ikeño'ó nuliyá pajno'okano. Kaja iyurí pu'umaré la'akana iliyó i'imaká. Eyá chuwa, ila'á piño nakaje ikeño'oká no'opiyá jema'akana wakajé, ila'aká i'imaká ke kaja. Unkájika ee iyurí pu'umaré la'akana iliyó, nuka'ajé iliyá vela

patajona. ⁶Re kaja kalé nojló palani nakaje ila'akare: Unká wani paala ijlo pu'uaré Nicolaítas nakiyana la'akare. Nupechu nakaje nala'akare nakú, ke kaja ipechu nakaje nala'akare nakú. ⁷Jema'á palá mékeka Tupana Pechu kemaká no'opiyá jema'ajéñojlo: Tára'ajeño kaphí nochojejlo no'ojé kajmuchaji, ne'emakáloje matajnako Tupana wa'até", ke Jesucristo kemaká nojló inaku.

**Puráka'aloji riwakára'akare pajimila
Esmirna e i'imakáñojlo marí**

⁸Jesucristo kemari piño nojló: "Piwakára'a piño marí puráka'aloji no'opiyá jema'ajeño wakára'ajeri Esmirna e i'imakárejlo. Pimá rijló: Matajnako i'imajika nuká. Nuká keño'ótari piyukeja nakaje i'imaká; nuká kaja ñapátajeri piyukeja nakaje me'etení i'imakare la'akana. Nenókare penájemi nuká, rejomi numakápo'o piño i'imaká. Raú numá inaku: ⁹Palá nuwe'epika chapú kaje yajwé amákare me'etení nakojé; nuwe'epí kaja kamu'ují ila'aká nakaje nakú maare. Je'echú chu, kajrú nakaje i'imajika ijlo. Nuwe'epí kaja pu'uaré ajopana kemakare inaku nakojé, nemá nanakuwá: "Tupana le'ejena weká", ke, e'iyonaja unká Tupana le'ejena kalé neká, Jiñá Chi'inárikana wa'atéjena ne'emakale. ¹⁰Ikeroniño chapú nala'ajíkare iká piyá. Jiñá Chi'inárikana wakára'ajeri ajopana ka'aká inakiyana ina'uké wajákelana chojé. Jiñá Chi'inárikana la'ajeri iká chapú; iyamá thé'ela ke kala rila'ajika iká chapú, riwátakale iyurika no'opiyá jema'akana. Jácho'oniño no'opiyá jema'akana chiyá raú; apala ke ka'ajná nenójika inakiyana, no'opiyá jema'ajeño i'imakale. Ilé ke ila'ajika ee, i'imajé matajnako je'echú chu, palá ila'akare wemí. ¹¹Jema'á palá mékeka Tupana Pechu kemaká Jesucristo ja'apiyá jema'ajéñojlo! Unká kaphí richojé péchuruna kapichálajo piño Tupana liyá", ke rimaká.

**Puráka'aloji riwakára'akare pajimila
Pérgamo e i'imakáñojlo marí**

¹²Jesucristo kemari piño nojló: "Piwakára'a piño marí puráka'aloji no'opiyá jema'ajeño wakára'ajeri, Pérgamo e i'imakárejlo. Pimá rijló nunaku: Riká jajalu kajé, iyamá pitari rireri jácho'okaro numá chiyá, kemari inaku:

¹³"Nuwe'epí mékeka nakaje ijlo ñakajela ewá. Kajrú ina'ukena, Jiñá Chi'inárikana wa'atéjena, rewá. Nawakára'ajeri wani riká; eyá iká jema'año palá no'opiyá. Antipas i'imakeri ina'ukejlo nuyukuna rewá i'imajika, richona nenó ri'imaká. Chapú

wani nala'aká ri'imaká, e'iyonaja unká imicho'otala nuchaya raú, kaphí ipechu nochojé. Ilé kaje aú ila'á palá. ¹⁴E'iyonaja kalé re nakaje ila'akare unká paala nojló: re ina'uké ijwa'até, unká wani paala napuráka'alo, Balaam michú puráka'alomi chuwa nala'á nakaje. Marí ke Balaam michú la'aká pu'uaré i'imaká: Rimá Balac michujlo i'imaká, ra'akáloje Israel lakénami me'é, najñákalaje a'ajnejí, nato'otákare nakaje jenami, 'wachi'inárikana riká', ke nemakare nakojé. Rimá kaja rijló, ra'akáloje name'é, nala'akáloje namanáicho ajopana wa'até penaje.

¹⁵“Re kaja e'iyowá ajopana, Nicolaítas puráka'alo ja'apiyá i'imakaño, pu'uaré wani nojló napuráka'alo, unká wani nuwátalare. Re kaja inakiyana unká yurílaño naliyó napuráka'alo a'akana nanakojó. ¹⁶Nekajlo pimá, napajno'otákaloje Tupana ejo napéchuwa pu'uaré nala'akare liyá. Unkaja ke napajno'otá napéchuwa pu'uaré nala'akare liyá, nu'ujnajé ne'emaká ejo nakapichátaje nupuráka'alo aú. ¹⁷¡Jema'á palá mékeka Tupana Pechu kemaká no'opiyá jema'ajeño nakú!” ke Jesucristo kemaká najló.

Rimá piño nojló: “Nula'ajé unká jácho'olajeño nupuráka'alo ja'apiyá jema'akana chiyá pechu kaphí. No'ojé kaja pajluwánojlo, pajluwánojlo ke, jipa jareni, rinaku wajé neí i'imajé lana'akeja. Unká na we'epílaje naka wajé neí i'imajika; nekaja kalé, no'ojkarenajlo wajé neí, we'epéjeño riká”, ke Jesucristo kemaká nojló inaku.

Puráka'aloji riwakára'akare Tiatira e i'imakáñojlo marí

¹⁸Marí ke Jesucristo kemaká ra'apiyá jema'ajeño wakára'ajeri, pajimila Tiatira e i'imakárejlo: “Tupana i'irí puráka'alo marí. Kera'athani ke ijluri, amari piyukeja nakaje. Pejru'uwá kapiluni, sereni ke ji'imari, kemari inaku: ¹⁹Nuwe'epí nakaje ila'akare nakojé. Nuwe'epí kaja íki'ija iwátaka ajopana ina'ukena; kaphí kaja ipechu nochojé; palá ila'aká ajopana ina'ukena nakú; unká kaja iyúcha'alo kiñaja. Nuwe'epí ila'aká palá me'etení; ikeño'oká no'opiyá jema'akana wakajé, chaje ila'aká palá me'etení.

²⁰“E'iyonaja kalé re apú nakaje ila'akare, unká wani paala nojló: re ilérowa ijwa'até Jezabel. Ruká kemayo runakuwá: ‘Tupana puráka'alo ja'apátajeyo nuká’, ke. E'iyonaja unká kewaka kalé rumaká, rupuráka'alo jimaje no'opiyá jema'ajeño nakiyana jácho'oño kewákaje puráka'aloji chiyá. Re nakaje jenami nemakare nakú: ‘wachi'inárikana jenami riká’, ke. Renami nakojé nato'otá a'ajnejí, rejomi na'á riká ajopánajlo, najñákalaje

penaje. Ruká kemayo ilé a'ajnejí nakú: 'Unká iná la'alá pu'uaré rajñakana aú'. Rumá kaja: 'Unká achiñana, inaana wa'até la'alá pu'uaré, nala'akachu namanáicho pajwa'atéchaka', ke. ²¹Kaja no'ó rojló we'echú ka'alá, rupajno'otákaloje rupéchuwa Tupana ejo rumanáicho rula'akare liyá, e'iyonaja unká ruwátala riyuríkana ruliyó. ²²Nuwakára'aje támikaje noka ruká, raú romaje kajrú chapú kaje yajwé. Ñaké kaja, la'año namanáicho rujwa'até, amájika chapú kaje yajwé ro'opona. Ilé ke nula'ajika neká chuwa. Napajno'otájika ee napéchuwa namanáicho nala'akare liyá, e unká nukapichátalaje neká rujwa'até. ²³Unkaja ke napajno'otá napéchuwa Tupana ejo, nukapichátaje ro'opiyá jema'ajeño rujwa'até, raú piyuke Jesucristo ja'apiyá jema'ajeño we'epeje mékajeka nuká. Palá nomaka ina'uké pechu; nuwe'epí mékeka napechu nakú nakaje nawátakare la'akana. Pu'uaré nala'akare lokópa'ala nuwajaje neká. ²⁴Eyá kajrú iká, Tiatira e i'imakaño, unká jema'alaño rupuráka'alo ja'apiyá. Unká kaja jema'alá Jiñá Chi'inárikana puráka'alo nemakare nakú: 'Me'echuje puráka'aloji riká', ke ja'apiyá. Iká unká jema'alaño ra'apiyá, ilé kaje palani, ijló numá: Me'etení ila'aká keja ila'ajika, unká numalaje ijló apú nakaje nakú ila'akáloje penaje. ²⁵Jácho'oniño puráka'aloji me'etení i'imakare ja'apiyá; ra'apiyaja i'imá, a'ajná nupa'ajiko eja'awá nakojé ejená", ke rimaká.

²⁶Rimá piño: "Nuká a'ajeri ina'uké, ajopana, ajopana ke, te'eré eyájena wakára'ajeño penaje. Marí ke i'imakaño ne'emajika: Unká jácho'olajeño nupuráka'alo ja'apiyá jema'akana chiyá; la'ajeño nakaje nuwátaka ke, a'ajná nataka'ajika ejená. Ilé kajena no'ojé ajopana ina'ukena wakára'ajeño penaje. ²⁷Nora'apá a'aká nuká iwakára'ajeri penaje, ke kaja no'ojika neká nawakára'ajeño penaje. Kaphí nawakára'ajika neká. Iná kapichátaka i'ichilá rimajáka'akana aú, keja unká jema'alaño Tupana ja'apiyá kapichájiko. ²⁸No'ojé no'opiyá jema'ajeño, ne'emakáloje matajnako nujwa'até penaje", ke Jesucristo kemaká.

²⁹Jema'á palá mékeka Tupana Pechu kemaká Jesucristo ja'apiyá jema'ajeño nakú, awakaño apú ewá, apú ewá ke, nakú.

Puráka'aloji riwakára'akare pajimila Sardis e i'imakáñojlo marí

3 ¹Jesucristo kemari piño nojló: "Piwakára'a kaja marí puráka'aloji no'opiyá jema'ajeño wakára'ajeri Sardis e i'imakárejlo. Pimá rijló nunaku: Jesucristo puráka'alo marí. Tupana Pechu ja'apiyá ke rila'aká piyuke nakaje. Iyamá kuwá'ata

kele ripalamane. Rinaku piyukeja numá: Palá nuwe'epika nakaje ila'akare nakojé. Ilérowa napechu inaku: 'Tupana Pechu ja'apiyá i'imakaño neká', ke. E'iyonaja unká ñaké kalé riká. ²Ñakele numá ijló: A'á inakojó nupuráka'alo; ila'á kaja kaphí ipéchuwa richojé, rikapichako piyá ipechu nakiyá. Unká paala waja nakaje ila'akare me'etení Tupánajlo, unká riwátaka ke kalé ila'akale nakaje. ³Iwajá ipéchuwa Tupana puráka'alo newíña'atakare iká nakojé; jema'á ra'apiyá; ipajno'otá ipéchuwa pu'uwaré ila'akare liyá. Unkaja ke a'á inakojó piño nupuráka'alo, nuphaje wajátakajo inaku. Jata'akachi iphákachu iná ñakaré chojé nakaje jata'ajé, unká ra'alá inajlo renó. Ñaké kaja unká no'olaje ijló nuphájika inaku jená.

⁴“Re mekeleja palá péchuruna pajimila Sardis e. Unká pu'uwaré la'ajeño kalé neká, ajopana i'imaká ke. Neká i'imajeño nujwa'até; palá napechu i'imajika nupalamane. Ilé ke ri'imajika najló, kaliyáruna ne'emakale nojló. ⁵Nupalamane ina'uké nakiyana ka'á nanakiyó pu'uwaré nala'akare, nekaja kalé i'imajeño palá nujwa'até je'echú chu. Unká kaja nolákalaje neí papera kaje chiyá, ríchuja neí i'imajé lana'akeja. Riká papera kaje chu lana'akéjami kemari mékajenaka i'imajeño je'echú chu matajnako nujwa'até. Tupana jimaje, rijwa'atéjena, je'echú chiyájena jimaje wa'ató, numaje nanaku: Nujwa'atéjena neká ke. ⁶Jema'á palá mékeka Tupana Pechu kemaká no'opiyá jema'ajéñojlo”, ke Jesucristo kemaká nojló inaku.

Puráka'aloji riwakára'akare pajimila Filadelfia e i'imakáñojlo marí

⁷Jesucristo kemari piño nojló: “Piwakára'a marí puráka'aloji no'opiyá jema'ajeño wakára'ajeri, Filadelfia e i'imakárejlo, pimá rijló: Jesucristo puráka'alo marí. Unká la'alá pu'uwaré nuká. Kewákaje puráka'aloji yukuna i'imajeri nuká. Nukaja kalé kemájeri ina'uké nakú, mékajenaka mujlúka'ajika je'echú chojé. Numájika nanaku keja nakaje i'imajika najló. Unká méño'oyo apú me'etálaje rapu najló; unká kaja méño'oyo apú italaje naliyá rapu. Nuká, Jesucristo kalé, kemájeri najló, namujlúka'akaloje je'echú chojé. ⁸Nuwe'epí nakaje ila'akare nakojé. Unká kaphí wani kalé ipechu nuwátaka ke la'akana nakú. E'iyonaja kalé a'á inakojó nupuráka'alo; unká kaja imicho'otala nuchaya; i'imá kaja nuyukuna ina'uké rewá i'imakáñojlo. Ñakele unká na kalé itájeri ijló rapu, i'imaká piyá nuyukuna najló. ⁹Re Jiñá Chi'inárikana wa'atéjena ilérowa. Neká kemaño nanakuwá: 'Jesucristo wa'atéjena weká', ke. Unká nujwa'atéjena kalé neká, mapeja

napajlaka nanakuwá. Neká nuwá'aje ijimaje, nawe'epíkaloje iká chá'ataka neká. Nawe'epeje kaja íki'ija nuwátakarena iká. ¹⁰Iká jema'año no'opiyá palá, ñakele nupalamane unká amálaje piyukeja chapú kaje eja'awá chuwa' i'imakare yajwé. Akijñojo piyukeja ina'ukena amájika chapú kaje yajwé. Raú Tupana atá'ajeri piyukeja ina'ukena eja'awá chu i'imakaño, ramákaloje mékeka napechu nunaku.

¹¹“Meketana i'imajemi nuká i'imajeri ichaje. Iká jema'año no'opiyá, jácho'oniño nupuráka'alo chiyá. Unkájika ee jácho'o richiyá, Tupana a'ajé ijló riwemí je'echú chu i'imakana aú. Iyuríniña ajopana jácho'otaka iká richiyá. ¹²Marí ke nula'ajika kaphí nochojé tára'ajeño nakú: Nuyureje ne'emaká ajopana, pu'ují péchuruna Tupana nakú, wa'até matajnako. Tupana le'ejena ina'ukena ne'emajika. Je'echú chu re wajé pajimila Jerusalén, riká pajimila witúka'ajeri je'echú chiyá majó. Re kaphí nochojé tára'ajeño i'imajé, raú ajopana we'epéjeño Tupana wa'atéjena neká. ¹³Jema'á palá mékeka Tupana Pechu kemaká no'opiyá jema'ajeñojlo”, ke Jesucristo kemaká inaku.

Puráka'aloji riwakára'akare pajimila Laodicea e i'imakáñojlo marí.

¹⁴Marí ke Jesucristo kemaká piño nojló:

“Eko piwakára'a kaja marí puráka'aloji no'opiyá jema'ajeño, Laodicea e i'imakáñojlo. Pimá nawakára'ajeri jlo nunaku: Jesucristo puráka'alo marí. Tupana wátaka ke la'ajeri riká. Kewákaje puráka'aloji nakú kemájeri riká. Rijwa'até Tupana keño'ótari piyukeja nakaje i'imaká. Riká penaje kemari inaku: ¹⁵Palá nuwe'epika piyukeja nakaje ila'akare nakojé. Nuwe'epí unká íki'ija kalé iwátaka nuká; unká kaja ipechu i'imalá chapú nunaku. Nuwata ipechu i'imaká pajluwaja chu waja nunaku. Nuwata ipechu i'imaká íki'ija nuwátakana nakú ka'ajná, chapú nunaku ka'ajná. Unká nuwátala ipechu i'imaká wejápaja nuwátakana nakú, eyá wejápaja chapú nunaku i'imakana nakú. ¹⁶Wejápaja kemachi iwátaka nuká, ñakele nuka'ajé nuliyo iká. ¹⁷Imá inakuwá: ‘Kajrú la'akaño weká, unká na nakú kalé wala'á kamu'ují’, ke. Unká iwe'epila mékeka iká nojló. Kamu'ují la'akaño ke iká nojló; chapú kaje yajwé amájeño penájena nojló iká; ma'arumakáruna ke iká nojló; mejluruna keja kaja nojló iká. ¹⁸Ijló numá: Ikeja'a nuliyo i'imakaje, i'imakáloje palá la'akaño raú. Raú i'imajé kajrú la'akaño ke nojló. Imá kaja nojló, nula'akáloje iká palá péchuruna, kaja keja iyuríkaloje reyá a'ajná ño'ojó penaje.

Imá kaja nojló, nula'akáloje ipechu palá, iwe'epíkaloje Tupana puráka'alo nakojé raú.

¹⁹“Neká, íki'ija nuwátakarena, nuwajá, nayuríkaloje pu'uwaré la'akaná naliyó, nema'akáloje no'opiyá palá penaje. A'á inakojó nupuráka'alo; ipajno'otá kaja ipéchuwa Tupana ejo pu'uwaré ila'akare liyá. ²⁰Iyaka'o, ñakaré numanaya nuwa'a ijló. Jema'arí nunúrupi mejé, me'etari nojló rinumaná, numujlúka'akaloje richojé, rijwa'até wajñaje wa'ajnewá pajñakani. ²¹Nupalamane ina'uké yurí naliyó pu'uwaré la'akaná, neká no'ojé nujwa'até wakára'ajeño penaje. Nuká chá'atari pu'uwaré la'akaná, ñakele chuwa Nora'apá awa'á nuká. Ina'uké wakára'ajeri nuká rijwa'até. ²²Jema'á palá mékeka Tupana Pechu kemaká no'opiyá jema'ajeño nakú”, ke Jesucristo kemaká nojló inaku.

Pu'ují je'echú chu i'imakaño pechu Tupana nakú yukuna marí

4 ¹Rejomi nomá piño je'echú numaná ke me'etákeja, richiyá noma'á pajluwa pura'akó. Luwiluwí mejé jema'akó, ke kaja rinúrupi mejé jema'akó. Maapami ke pura'akó nujwa'até penájemi ri'imaká. Riká kemari piño nojló: “Pácho'o majó, nuya'atachi pijló mékeka nakaje i'imajika marí ejomi”.

²Rejéchami Tupana Pechu ja'apiyá ke nócho'oko je'echú chojé. Re nomá ñáka'ajori nawakára'ajeriñlo penaje, richu nomá pajluwa yá'ako. ³Jipa palá nojé wani diamante, eyá rubí, ke rijimá amako. Ilé jipa palá nojé wani ke ramákana i'imaká. Ñáka'ajori nakuwá nomá yurijiri chipúka'aka, esmeralda kamaré ke rikamaré i'imaká. ⁴Pe'iyó ñáka'ajori i'imakare nakojé veinticuatro ñáka'ajori chipúka'ari tujlá ke pajimájechaka. Nawakára'ajeño ya'akóloje richu penaje ri'imaká. Veinticuatro kaja pheñawilana yá'año richu. Jaré nojé waja na'arumaká i'imaká. Pútenaji kaje oro nakiyá la'akanami i'imari nachá. ⁵Ñáka'ajori pe'iyó yá'ako e, noma'á kajrú pichaní majáka'ako mejé. Riká ñáka'ajori jimaje nomá kaja iyamá kuwá'ata kele kamareji lapa'akó lukúna'akeja. Tupana Pechu kele kaja ri'imaká. ⁶Pe'iyó ñáka'ajori i'imakare nakú nomá kaja kajrú wíluru kaje, me'ejñapí nojé wani, to'okó, jamára'apani ri'imaká.

Ñáka'ajori awa'á nomá ajopana pa'u kele lapa'akó. Pajluwaja tára'aro majó pitá nakojó; apú tára'aro apo'ojó pitá nakojó; eyá apú tára'aro riwajlé chojó; eyá apú tára'aro rijimá ejo pitá nakojó, ke natára'ako. Kajrú nojé nejlú i'imaká piyukeja nanakuwá, najimá chuwa, nawajlé chuwa wa'ató, nejlú paja'ó nanakuwá. ⁷Pajluwaja nanakiyana amaro león ke; apú amaro jema pirakana achiñá ke; apú jimá amaro ina'uké jimá ke; iná amaka Perú ajraka, ke

apú amako. ⁸Pa'u kele ne'emaká, kayuphéruna waja ne'emaká. Pajluwa kuwá'ata keleno waja nayuphé i'imaká nanaku; kejlú nojé nayuphé i'imaká. Ra'apojó pitá kajrú nejlú i'imaká; richajo pitá kajrú kaja nejlú i'imaká. Unká nayurila jataníkaje, rinákuja ne'emá we'echú, eyá lapí ketana. Marí ke nataníjika:

“Palani, palani, palani Tupana, unká la'alá pu'uaré.

Piyukeja wakára'ajeri riká.

Piyukeja la'ajeri kaja riká.

Riká i'imari paineko i'imaká;

rikaja kaja me'etení.

Ñakeja ri'imajika maáreya watukumó a'ajná ño'ojó”.

⁹Ilé ke neká pa'u kele atanika. Palá nemájika pe'iyorí ñáka'ajori chu yá'ako nakú. Matajnako penaje riká, palá rila'aká nanaku yukuna ne'emá jataníkaje aú. ¹⁰Natanika aú neká veinticuatro pheñawilana láma'año rinakojé najimá aú. Pe'iyorí ñáka'ajori chu yá'ako nakojé najláma'o, pu'ují napechu i'imakale rinaku. Unká tajnákajo penaje kalé i'imajika nakú napechu i'imá pu'ují, raú naka'á napútena ri'imá nakojé, nemá Tupánajlo:

¹¹“Wawakára'ajeri, kaphí wapechu i'imakare chojé.

pikaja kalé palani, wemakáloje pinaku palá penaje;

pikaja kalé palani, wapechu i'imakáloje pinaku palá penaje;

pikaja kalé we'epiri piyuke nakaje la'akana;

pikaja kaja kalé keño'ótari piyukeja nakaje i'imaká.

Pikaja kaja kalé kaja a'arí pu'uwaká nakaje ina'ukejlo,

pipechu nakú ri'imaká ke.

Kajmuchaji a'ajeri wani piká”,

ke nemaká rijló.

5 ¹Nomá kaja papera kaje, phila'akeja i'imaká, pe'iyorí ñáka'ajori chu yá'ako kapi. Ka'aña aú ripatá riká; riyámajo pumitanó rinaku lana'akéjami i'imaká; iyamá kuwá'ata kele ripapi i'imaká rinaku. ²E nomá Tupana wa'atéjeri, je'echú chiyaje, piyuke la'ajeri ri'imaká. Riká kemari kaphí mejrini chiyá marí ke: “¿Na palani Tupánajlo maare, riká ka'akáloje ripapi rinakiyá penaje?”

³Unká na i'imalá palani papera kaje me'etájeri penaje, ramákaloje mékeka lana'akéjami kemaká richu. Unká na i'imalá je'echú chu, unká kaja na i'imalá eja'awá chu, unká kaja na i'imalá kaja taka'akaño nakiyana e'iyá, rijme'etájeri penaje. ⁴Kajrú nuyaka, unkale na i'imalá palani rijme'etájeri penaje, ramákaloje ripuráka'alo richu penaje. ⁵E pajluwaja pheñawilana, re i'imakaño nakiyana, kemari nojló: “Piyániña, piyaka'o, re pajluwaja, nawakára'ajeri wani. Judá lakénami nakiyana riká; ne'emakana

David lakénami nakiyana kaja riká. Riká kapichátari pu'uwaré la'akaná ina'uké liyá. Rikaja kalé palani papera kaje me'etájeri penaje. Palani riká ripapi ka'ajeri rinakiyá penaje”, ke rimaká nojló.

⁶Rejéchami nomaka riká, nemakare nakú: “Oveja i'irí (el Cordero)”, ke. Nomá ritára'ako pe'iyó. Pa'u kele lapa'akaño, eyá veinticuatro pheñawilana, kele lapa'año rinaku tujlá ke pajimájechaka. Nenókare penájemi keja Oveja i'irí amako. Iyamá kuwá'ata kele ri'iwawi i'imaká; iyamá kuwá'ata kele kaja rijlú i'imaká; iyamá kuwá'ata kele Tupana Pechu, ripalamane i'imakare nakiyana ri'imaká, riwakára'akare piyuke eja'awá chuwá i'imaká.^a

⁷E Oveja i'irí i'ijnari pe'iyorí ñaka'ajori chu yá'ako jimaje. Rijñáá riká papera kaje phila'akéjami riyáthe'ela ka'añá chiyá. ⁸Ilé kaje aú re pa'u kele lapa'akaño, veinticuatro pheñawilana wa'até, láma'año Oveja i'irí nakoje najimá aú. Guitarra kaje waja i'imari nakapi; tiyela, oro nakiyá la'akanami, i'imari kaja nakapi. A'awaná iká, iná kára'atakare, i'imari tiyela chu. Nakaje Tupana le'ejena ina'ukena kemakare nakú rijwa'até pura'akano aú, ke kemakánaka a'awaná iká, i'imari tiyela chu.

⁹E nataní waje yáleje Tupánajlo marí ke:

“Palani piká Tupánajlo, ilé papera kaje ña'ajeri penaje.

Palani piká Tupánajlo, rijme'etájeri penaje,

ripapi ka'ajeri rinakiyá penaje.

Nenó pi'imaká, pitaka'á ina'uké chaya i'imaká,

ne'emakáloje Tupana wa'atéjenu raú penaje.

Ajopana, ajopana ke, rijwa'atéjenu i'imakáloje penaje

pitaka'á nachaya i'imaká.

Ajopana, ajopana ke, iká'ana nakiyana i'imaño rijwa'atéjenu.

Apú, apú chu, ke pura'ajeño nakiyana i'imaño kaja

rijwa'atéjenu.

Piyukeja ajopana te'eré, ajopana te'eré eyájenu, ke i'imaño

rijwa'atéjenu.

¹⁰Piká a'arí neká Tupana wa'atéjenu penaje,

nala'akáloje riwátaka ke penaje.

Piká kaja a'arí neká piyuke eja'awá chu i'imakaño

wakára'ajeño penaje”,

ke natanika rijló. ¹¹E nuyaka'o piño ají ke, amari Tupana wa'atéjenu, je'echú chiyájenu. Jataníkaje nakú kaja ne'emá. Íki'iruna wani ne'emaká, millones ne'emaká. Ajopana i'imaño

ñaké kaja millones kaja. Neká piyuke i'imaño tujlá ke pajimájechaka ilé yá'aro ñaka'ajori chu nakojé. E neká pa'u keke lapa'akaño, veinticuatro pheñawilana wa'até, ataniño kaja Tupánajlo kaphí wani. ¹²Marí ke nemaká kaphí nataniko:

“Oveja i'irí, nenókare ina'uké chaya i'imaká, palani riká,
Tupana a'akáloje riká piyukeja amájeri penaje.
Palani riká, piyukeja nakaje i'imakáloje ríle'ejé waja penaje.
Palani riká, piyukeja ina'uké pechu i'imakáloje rinaku palá
penaje,
piyukeja we'epika ri'imakale.

Palani riká, piyukeja ina'uké pura'akóloje rinaku palá penaje”, ke natanika riyló. ¹³Rejomi noma'á ajopana atanika piño, Tupana keño'otakarena ne'emaká: eja'awá chu i'imakaño, je'echú chu i'imakaño, kaja taka'akaño penájemi, keke ne'emaká. Piyukeja neká, kamejérina wa'ató, ataniño. Marí ke nemaká nataniko:

“Palá wemaká keke yá'aro ñaka'ajori chu nakú.
Palá kaja wemaká Oveja i'irí nakú.

Palá kaja wapechu i'imajika nanaku ñakeja.

Piyukeja nakaje la'ajeño ne'emajika wa'ajini wani”, ke natanika. ¹⁴Pa'u keke re lapa'akaño a'ajipaño najló: “Ñaké jo'ó ri'imajika”. E pheñawilana láma'año rinakojé, napechu i'imakale pu'ují Tupana nakú.

Ripapi yukuna marí

6 ¹Rejomi nomá Oveja i'irí wicho'oká pajluwa ripapi. papera kaje phila'akéjami, nakiyá. Raú pajluwaja, pa'u keke re lapa'akaño nakiyana, wá'ari nojló: “Majó pi'ijná”, ke.

Pichaní majáka'ako mejé, ke rinúrupi mejé i'imaká. ²E nuyaka'o, amari kawarú jareni. Rinaku pajluwaja yá'aro. Wira'apaji i'imari rikapi. Apú a'arí pútenaji richá. E nachá'atajeri ke ra'apaka kawarú nakú. Raú ri'ijná ajopana chá'ataje nókakajo aú.

³Rejomi Oveja i'irí wicho'orí apú ripapi, papera kaje phila'akéjami, nakiyá. Rejéchami apú, pa'u keke lapa'akaño re, nakiyana kemaká nojló: “Majó pi'ijná”.

⁴Raú nu'ujná rejo, amari apú kawarú jácho'oko, kerani ri'imaká. Apú a'arí rinaku ja'apájerijlo jajalu kaje kajruni wani. Rinaku ja'apájeri wakára'ari ina'uké nókako pajwa'atéchaka eja'awá chuwá, raú nakapichátakaloje pekowáaka.

⁵Rejomi Oveja i'irí ka'arí piño apú ripapi rinakiyá. Weji keke cha rika'aká ripapi.

Raú apú, pa'u kele re lapa'akaño nakiyana, kemari nojló: “Majó pi'ijná”.

Nuyaka'o rejo, amari apú kawarú, kameni ri'imaká. Rinaku ja'apájeri kapi nomá kachini jená ña'ajona i'imaká. ⁶Pa'u kele re lapa'akaño nakiyana kemari: “Pajluwa kala iná jápaka'ala wemí na'á inajlo pajluwaja jená ña'akó trigo. Pajluwa kala iná jápaka'ala wemí na'á inajlo weji kele jená ña'akó cebada. ¡Pa! Apichániña Olivos icha jilá. Apichániña kaja kajmú kaje jalá amúra'atakanami”, ke.

⁷Rejomi Oveja i'irí ka'arí piño apú ripapi, pa'u kele la'aká kele papera kaje, nakiyá. Rejéchami apú piño, kele pa'u kele re lapa'akaño, nakiyana kemaká nojló: “Majó pi'ijná, piyaka'o”.

⁸Nuyaka'o rejo, amari piño apú kawarú, memáreni ri'imaká. Rinaku ja'apájeri íi i'imari Taka'akaje. Rápumichu apú ja'apari. Kaja Taka'akaño, Pu'uwaré La'akaño Apukuna, ríi i'imaká. Neká wakára'año ina'uké nókako pajwa'atéchaka. Nawakára'a kaja kajrú me'epijí, kajrú ina'ukena taka'akáloje raú penaje. Nawakára'a kaja natami kaje noka kajrú ina'ukena, nataka'akáloje rinaku. Nawakára'a kaja kamejérina yuriná noka ina'uké. Ilé ke nawakára'aka kajrú ina'ukena la'akana chapú eja'awá chuwa.

⁹Rejomi Oveja i'irí ka'arí piño apú ripapi, pajluwa thé'ela kele la'aká kele papera kaje phila'akéjami, nakiyá. E nomá kaja taka'akaño péchumi i'imaká altar ja'apí. Nenókarena ne'emaká, na'apátakale Tupana yukuna ajopánajlo, jimaje nala'á ne'emaká chapú. Chapú nala'ajika neká, e'iyonaja unká nayurike Tupana yukuna i'imakana raú. ¹⁰Awíyo'okeya nemaká Tupánajlo: “Piká wawakára'ajeri. Piyukeja we'epika nakaje la'akana piká. Unká we'epila pu'uwaré la'akaná piká. Pimaká ke la'ajerí piká. ¿Mékechami pimájika noño we'emaká nakú, meke nala'akana i'imajika? ¿Mékechami piwajájika neká ripachá?”, ke nemaká Tupánajlo.

¹¹E apú a'arí najló pajluwano, pajluwano ke a'arumakaji jaré nojé wani. Rimá najló, nawatána'akaloje re kaja jo'ó piño. Nenoje piño nejena nakiyana, nenoka ne'emaká ke kaja. Najlupemí chami ne'emajika ejéchami Tupana wajájika nenójeño. ¹²E nomá piño Oveja i'irí ka'aká apú ripapi papera kaje nakiyá. Pajluwa kuwá'ata kele (6) cha rika'aká ripapi rinakiyá. Raú nomá eja'awá ñaka'akó kajrú wani, wa'ató ke kamú jimá yakaka kamé. A'arumakaji kameni, me'ejñapí nojé wani, ke rijimá amako. Wa'ató ke kerá kerí amako; jirá ke rijimá amako. ¹³Iwijrina kaje nakiyana kujrúka'año eja'awá nakojé. Pají icha, unká jo'ó aparálare, karená

kujrúka'ataka, ke nakujrúka'aka marí eja'awá nakojé. ¹⁴Wa'ató ke je'echú kapichako. Iná phila'aká papera kaje, ke kaja rikapichako. Piyuke wani ipuré, paranakuwa kaje maká, jatatako rapukuna chiyá apo'ojó.

¹⁵Rejéchami piyukeja ina'uké wakára'ajeño ñaakó raú, jata'año jipa pajremi chojé. Piyuke neká jata'año: nawakára'ajeño, suráana wakára'ajeño, kajrú la'akaño, kajrú péchuruna, wejapa péchuruna, ajopana wa'até jápajeño, najluwa jápajeño, kele piyukeja neká jata'año jipa pajremi chojé. Ne'iyajena ñaaño ipuré e'iyajé jata'ajó. ¹⁶Nemá jípajlo ra'akóloje nachá penaje, Tupana amaka piyá neká. Piyuke wakára'ajeri riká. Nemá jípajlo ra'akóloje nachá penaje, nameñátakoloje ra'apejé Oveja i'irí yuchá liyá. ¹⁷Kaja riphá rená chojé unká jema'alaño ra'apiyajlo, namákaloje riyuchá yajwé. Unká na kalé ña'ajeri riyuchá panaku.

7 ¹⁻²Rejéchami nomaka pa'u kele Tupana wa'atéjena, je'echú chiyájena. Pa'u kele eja'awá ku'uruwere keja natára'ako. Neká pataño pa'u kele karená, ra'apaka piyá piyuke eja'awá e'iyowá. Napatá riká, ra'apaka piyá juni jalomi jimó, a'awaná e'iyowá wa'até. Tupana kemari najló i'imaká, napichátakaloje eja'awá, juni jalomi, kaje maká penaje. E nomá piño apú Tupana wa'atéjeri, je'echú chiyaje, iphaka kamú jeño'oká eyá. Kajmuni Tupana le'ejé lana'ajówaji i'imari rikapi. Awíyo'okeya rimaká ajopana Tupana wa'atéjenajlo, eja'awá ku'uruwere chu tára'akañojlo wa'até: ³“Ikapichátaniña eja'awá, juni jalomi, a'awaná, kaje maká wa'até, Tupana le'ejena ina'ukena i'imakale rewá. Paineke walana'ajé Tupana le'ejena ina'ukena pulá nakú, nawe'epíkaloje Tupana le'ejena neká raú”, ke rimaká najló.

⁴Nemá nojlo: “Kaja nalana'á ciento cuarenta y cuatro mil (144,000) Israel lakénami nakiyana pulá nakú, raú ajopana we'epíkaloje neká pe penaje. ⁵Doce mil nanakiyana i'imaká Judá michú lakénami, doce mil kaja i'imaño Rubén michú lakénami nakiyana, doce mil kaja i'imaño Gad michú lakénami nakiyana, ⁶doce mil kaja i'imaño Aser michú lakénami nakiyana, doce mil kaja i'imaño Neftalí michú lakénami nakiyana, doce mil kaja i'imaño Manasés michú lakénami nakiyana, ⁷doce mil kaja i'imaño Simeón michú lakénami nakiyana, doce mil kaja i'imaño Leví michú lakénami nakiyana, doce mil kaja i'imaño Isacar michú lakénami nakiyana, ⁸doce mil kaja i'imaño Zabulón michú lakénami nakiyana, doce mil kaja i'imaño José michú lakénami nakiyana, doce mil kaja i'imaño Benjamín michú lakénami nakiyana. Ilé kele ne'emaká.”

Jareni a'arumakáruna yukuna marí

⁹Rejomi nuyaka'o piño, e nomá kajrú wani ina'ukena tami yá'ako. Unká méño'ojo iná lapa'atala ne'emaká, íki'iruna wani ne'emakale. Ajopana, ajopana ke, ne'emaká apú, apú chu ke pura'ajeño. Piyuke ajopana te'eré, ajopana te'eré eyájena ke, ne'emaká. Náka'ajori, Tupana yá'akaro chu, awa'á natára'o. Oveja i'irí awa'á natára'o. Jareni a'arumakáruna waja ne'emaká piyukeja, wejirí wirulá nakapi ke natára'ako. ¹⁰E kaphí nawíyo'oko nemaká:

“We'ematójeri Tupana,

kaphí wapecchu i'imakare chojé riká, yá'aro náka'ajori chu.

Ri'irí palamane ri'imatá weká kapichákajo liyá”,

ke nemaká. ¹¹Piyuke Tupana wa'atéjena, je'echú chiyájena, tára'ako Tupana awa'á, veinticuatro pheñawilana wa'até. Pa'u kele re lapa'akaño i'imaño kaja re najwa'até, e najláma'o najimá aú Tupana nakojé. ¹²Nemá:

“Palani Tupana, wapura'akóloje palá wani rinaku penaje.

Palá rila'akare weká yukuna we'emá rijló.

Piyukeja nakaje nakojé we'epéjeri riká.

Palá kaja ina'uké pechu rinaku.

Piyukeja nakaje la'ajeri riká;

piyukeja kaja riwe'epika nakaje la'akana.

Ilé kaje Tupana, wapecchu i'imakare chojé kaphí,

matajnako i'imajika riká”.

¹³E pajluwaja pheñawilana nakiyana kemari nojló: “¿Mékajena ina'ukena chi kele jaré a'arumakáruna? ¿Mere eyájena chi neká?” “Kaapi”, ke numaká rijló, “piká we'epiri”. ¹⁴Rimá nojló: “Chapú wani nala'aká Tupana ja'apiyá jema'ajeño i'imaká. Unká ileruna pamákarena me'etení, yurila naliyó Tupana ja'apiyá i'imakana raú. Tupana a'arí Ri'irí Jesucristo ina'ukejlo i'imaká, nenókalaje riká pu'uaré nala'akare chaya penaje, raú rika'á riká naliyá. Neká pamákarena me'etení, yuriño nachó rijló, raú rila'á neká unká japi la'alaño pu'uaré ke rijló. Kele jareni a'arumakáruna, jareni na'arumaká, nepakale re'iyayá Oveja i'irí írami aú.

¹⁵“Tupana awa'á neká; riwátaka ke nala'ajika ñakeja wani riñakaré chu.

Tupana mejñátari neká, rawa'á ne'emakale.

¹⁶Unká wani kewí me'epijí i'imalaje najló, unká kaja nanúrupi chu makára'atalajo, unká kaja kamú kára'atalaje neká, unká kaja ima'á i'imalaje najló.

¹⁷ Oveja i'irí, Tupana awa'á i'imakare, i'imajeri namájeri.

Riwá'aje neká juni matajnako jeño'ojika te'erí e'iyayá ejo.

Inajlo kajmuchá a'ajeri penaje riká juni. Rejo riwá'aje neká.

Tupana jalákajeri nejlú jalá nejlú chiyá.

Reyá a'ajná ño'ojó unká iyakaje i'imalaje najló”,

ke rimaká nojló.

8 ¹E kaja Oveja i'irí ka'arí kaja penaje ripapi i'imakare papera kaje nakiyá. Rika'aká riká ejomi, mamejeru wani je'echú chu yuriko pe'iyojé kamú jená ketana. ²Rejéchami nomaka iyamá kuwá'ata kele Tupana wa'atéjena, je'echú chiyájena, tára'ako Tupana jimaje. E pajluwa a'arí pajluwano, pajluwánojlo ke, luwiluwí kaje.

³Apú Tupana wa'atéjeri i'imari re, rikapi nomá oro nakiyá la'akanami a'awaná iká, pu'umé amarí kára'ajona. Rile'ejena ina'ukena pura'año Tupana wa'até, ke kemakánaka ri'imaká.

⁴Nomá ija jácho'oko Tupana wa'atéjeri le'ejé rikára'ajona chiyá, wa'até ke kaja ina'uké puráka'alo jácho'oko. Tupana wa'até pura'akano nakú ne'emá. ⁵E Tupana wa'atéjeri ña'arí kera'athani mesa nakiyá, rimano'otákaloje a'awaná iká a'akunami raú penaje. Kéchami rika'aká riká je'echú chiyá, ají ke eja'awá nakojé. Raú kajrú pichaní majáka'ako; kajrú kaja rimejé i'imaká; kajrú pichaní kamaré pataká; eja'awá ña'akaró kaja raú.

Luwiluwí kaje yukuna marí

⁶Re iyamá kuwá'ata kele Tupana wa'atéjena, je'echú chiyájena i'imaño. Iyamá kuwá'ata kele kaja luwiluwí kaje i'imaká nakapi, kaja lamá'atakejanami ke ne'emaká, napho'okáloje richojé penaje.

⁷Pajluwaja nanakiyana apho'orí riluwiluwine kaje chojé, raú juni taka'átakanami, kera'athani jirá wa'até, ja'aró je'echú chiyá eja'awá nakojé. Raú kajrú eja'awá lukúna'ako; a'awaná, jimichi, kaje maká kára'ataro. Pe'iyó ja'apejé eja'awá nakiyana kapichako raú.

⁸Rejomi apú Tupana wa'atéjeri, iyamá la'aká, apho'orí kaja riluwiluwine kaje chojé, raú ipuré kára'ako, ke amákanami ja'aró juni jalomi jakojé. Raú pe'iyó ja'apejé yuriro jirá ke; ⁹pe'iyó ja'apejé kaja juni jalomi yajné nakiyana kapichaño raú. Ñakeja kaja pe'iyó ja'apejé wapuru, rakú i'imakare nakiyana, kapichako raú.

¹⁰Rejomi apú Tupana wa'atéjeri, weji kele la'aká, apho'orí piño riluwiluwine chojé, raú iwíjri kajruni wani ja'aró je'echú chiyá majó. Jepé lukúna'akeja ke ra'akó junápeje, raú rapichata ajopana,

ajopana ke, le'ejé juni. Rapichata juni, muthú kaje wa'ató. Pe'iyó ja'apejé piyuke juni nakiyana apichako raú. ¹¹Ipijini, riká iwijrí íí i'imaká, ja'aró majó; pe'iyó ja'apejé piyuke juni nakiyana la'akó ipijí raú. Kajrú ina'ukena taka'aká rinakiyana i'irakana aú, ipijini ri'imakale.

¹²Rejomi apú Tupana wa'atéjeri, pa'u ke la'aká, apho'orí piño riluwiluwine chojé, raú kamú, keri wa'até, nakiyana apicharo pe'iyó ja'apejé. Ñaké kaja iwijrina nakiyana apichako pe'iyó ja'apejé kaja, ñakele rikamaré patá wejápaja rapichako lokópa'alaja. Pe'iyó ja'apejeja rikamaré i'imaká we'echú japi, ñaké kaja lapí japi i'imaká.

¹³Rejomi nuyaka'o je'echú chojé, amari perí kaje ajraka yenuwa, kaphí rimaká: “Chapú wani, chapú wani ke, re kaja jo'ó weji kele Tupana wa'atéjena yuriko, unká jo'ó apho'olaño naluwiluwine chojé. Nakeño'ojika richojé apho'okana wakajé, chapú wani nakaje i'imajika ina'uké eja'awá chu i'imakáñojlo”.

9 ¹Rejomi apú Tupana wa'atéjeri, pajluwa th'éela kele la'aká, apho'orí piño riluwiluwine chojé, raú i'ijwijí ke ja'aró je'echú chiyá majó. Rijló apú a'á chawi, ulawí me'etájona penaje. Ulawí matajnáka'aru me'etájona ri'imaká. ²Raú rijme'etaka richaya ejéchami, kajrú wani ija jeño'oká richiyá majó. Iná i'ikakapere e'iyá iná kára'aka ee, ija jeño'oká, ke reño'oká majó richiyá. Unká kamú amalo rinakojé, ija itákale rijimá. ³Ija e'iyayá majichíra'apana kajena kujrúka'año marí eja'awá nakoje; ipijí i'iraká ke kewika ne'eraká ina'uké. ⁴Nawakára'ajeri kemari najló, nakapichátaka piyá a'awaná, jimichi, piyukeja nakaje te'erí e'iyá iphákare, kaje maká wa'até. Rimá kaja najló, nala'akáloje ina'uké, unká Tupana le'ejena kalé i'imakáno, chapú, unká Tupana lana'akare i'imalárena pulá nakú. ⁵Unká nawakára'ajeri yurila nenoka neká, riwata nala'aká neká chapú pajluwa th'éela keta keri ketana. Kewí ne'eraká neká, ipijí i'iraká iná ke kaja. ⁶Ne'erajika neká wakajé, nawátakejla taka'akaje, e'iyonaja unká nataka'aké rikeyá nakú; nakulákejla naowá, e'iyonaja unká nephátake riká.

⁷Kawaruna i'ijnaká nókakajo ejo, ke majichíra'apana amako. Newíla'aru nakú pútenaji ke i'imari oro nakiyá la'akanami; ina'uké achiñana jimá, ke najimá i'imaká; ⁸inaana wilá, ke newilá i'imaká; león aí, ke naí i'imaká; ⁹ne'ekú pajré i'imari pejru'uwá nakiyana la'akanami. Kajrú wani nayuphé mejé i'imaká najraka kewá. Kawaruna chíra'aka pe'iyowá ja'apaka jecho'okelo, richu ja'apákano i'ijnakáloje ajopana wa'até nókajo, ke nayuphé mejé i'imaká. ¹⁰Kajipíruna ne'emaká, rinaku ne'erajowa i'imari ipijí

i'irajowa ke. Riká najipí aú nala'á ina'uké chapú pajluwa thé'ela keta kerí ketana. ¹¹Re nawakára'ajeri, rikaja kaja ulawí chiyá wakára'ajeri. Abadón ríí hebréona pura'akó chu; eyá griégona pura'akó chu ríí i'imari Apolión. “Apichátajeri”, ke kemakana ríí i'imaká ñaké.

¹²Kaja chapú kaje paineko i'imakare ja'apari; re jo'ó kaja jo'ó iyamá yuriko.

¹³E kaja apú Tupana wa'atéjeri, pajluwaja kuwá'ata kele la'aká, apho'orí piño riluwiluwine chojé; raú puráka'aloji mejé jácho'oro mesa ku'uwere chiyá. Pa'u kele riku'uwere chiyá puráka'aloji jácho'oro. Tupana jimaje riká mesa tára'o, oro nakiyá la'akanami ri'imaká. ¹⁴Puráka'aloji kemari Tupana wa'atéjeri apho'orí riluwiluwine chojejlo: “Juni Éufrates e pa'u kele Tupana wa'atéjena a'akéjami mukúruna, chuwa pika'á namukú nanakiyá”. ¹⁵Raú rika'á namukú nanakiyá. Pa'u kele ne'emaká, kaja riphá rená chojé najló. Riká kamú jená, riká we'echú, riká kerí, riká jarechí, ke ne'emaká lámá'atakeja, nakapichátakaloje kajrú ina'ukena penaje. Pe'iyó ja'apejé nakapichata piyuke ina'uké nakiyana. ¹⁶E kaja nemá nojló mékele suráana i'imaká najwa'atéjena: kawaruna nakú ja'apákaño i'imaño doscientos millones.

¹⁷Nutapú keja nomaka kawaruna, nanaku ja'apájeño wa'até. Marí ke nomaka neká: suráana i'ikú mejñátajona i'imari nanaku, kerá nojé waja ne'ekú mejñátajona i'imaká, kera'athani ke ramako. Ipureni, jewani wa'até, i'imari kaja rinaku. Nakawarútena wíla'aru amaro león wíla'aru ke. Kera'athani, ija, azufre, kele wa'até jeño'orí nanuma chiyá. ¹⁸Raú nakapichata ina'uké nakiyana, pe'iyó ja'apejé nakapichata. Kera'athani, ija, azufre, kaje jeño'orí kawaruna numá chiyá; riká aú nakapichata ina'uké. ¹⁹Nanuma chiyá jeño'okare aú ja nakapichata neká; najipí aú nala'á kaja ina'uké chapú. Jeína, ke kawaruna jipí i'imaká.

²⁰Ilé ke nala'aká neká chapú. E'iyonaja neká, unká nakapichátalarena, unká yurila naliyó nakaje jenami ja'apí iphákana, nemakare nakú, “wachi'inárikana”, ke. Pu'ují napechu i'imajika jiñana nakiyana nakú, ñaké kaja napechu i'imajika nakaje jenami nakú. Oro, plata, pejru'uwá, jipa, a'awaná, kaje maká nakiyá la'akanami ri'imaká. Unká méño'ojo nakaje jenami, nala'akare nachi'inárikana penaje, amala; unká kaja méño'ojo rema'alá; unká kaja ra'apala. Ilé kaje i'imari najló nachi'inárikana ke, unká nayurila naliyó riká. ²¹Unká kaja napajno'otala napéchuwa Tupana ejo, ina'uké nókana liyá; unká kaja nayurila naliyó nalawichure, lejñákaje wa'até; unká kaja achiñana, inaana

wa'até, pajno'otala napéchuwa, namanáicho nala'akare liyá; unká kaja nayurila jata'akaje naliyó.

10 ¹Rejomi nomá piño apú Tupana wa'atéjeri witúka'aka je'echú chiyá. Kajrú we'epika nakaje la'akana nakojé ri'imaká. Juni juwáka'ala e'iyowá riwitúka'a. Yurijiri chipúka'ari riwíla'aru nakuwá; kamú jimá ke rijimá i'imaká; eyá ritajné i'imari kera'athani ke. ²Kamu'ujini papera kaje phila'akéjami i'imari rikapi. Me'etákeja ri'imaká. Ri'imá, ka'añá chojó pitari, tára'aro juni jalomi jakú, eyá pajrú chojó pitari tára'aro pe'iyojó te'erí nakú. ³Kaphí wani rawíyo'oka. León awíyo'oka mejé, ke rinúrupi mejé i'imaká. Rawíyo'oka ejomi, iyamá kuwá'ata kele pichaní mejé a'ajipá rijló. ⁴Na'ajipaká rijló ejomi, nuwata riyukuna lana'akana papera kaje chojé, nakaje nemakare nakú. Nukeño'ó riyá'atakana ejéchami noma'aká puráka'aloji jácho'oko je'echú chiyá, rimá nojló: “¡Pa! Pilana'aniña riyukuna papera kaje chojé mékeka iyamá kuwá'ata kele pichaní mejé kemaká. Pi'imaniña kaja riyukuna ajopánajlo”, ke rimaká nojló.

⁵E riká Tupana wa'atéjeri, nomákare tára'ako juni jalomi jakú, eyá te'erí nakú, jácho'otari ra'anapitá ka'añá ají ke je'echú chojé. ⁶E rimá najló mékeka nakaje i'imajika. Nawe'epíkaloje rimaká rinaku ke ri'imajika najló penaje, rimá: “Tupana we'epiri kewaka numaká”, ke. Unká tajnákajo penaje kalé i'imaká Tupana. Riká keño'ótari je'echú, eja'awá, juni jalomi wa'até, richu i'imakare wa'atoja. E Tupana wa'atéjeri kemari: “Chuwa kaja unká rimalára'alajo, meketana i'imajémija ri'imajé. ⁷Tupana wa'atéjeri, iyamá kuwá'ata kele la'aká, apho'orí riluwiluwine chojé. Rejéchami Tupana ñapátaka nakaje la'akana, ripechu nakú i'imakare, me'echú ri'imaká ina'uké liyá júpimi i'imaká. Ripuráka'alo ja'apátajeño michuna i'imakeño rijwa'até jápajeño ke, neká i'imakeño riyukuna i'imajika”, ke rimaká.

⁸Rejomi puráka'aloji, noma'akare iphaka je'echú chiyá majó penájemi, kemari piño nojló: “Pi'ijná Tupana wa'atéjeri i'imaká ejo. Pajrú chojó pumitá ri'imá juni jalomi jakú, apo'ojó pitari te'erí nakú, riká ejo pi'ijná. Eko pijña'á rikápiya papera kaje”, ke rimaká.

⁹Raú nu'ujná rejo, numá rijló: “Pa'á nojló ilé papera kaje pikápiri”. Rimá: “Marí riká, pijña'á riká, pajñachi riká. Munumunú jalá ke pumeka ra'apájika pinuma chu. Eyá piwó chojé riphájika ee, rila'ájó ka'amani”, ke rimaká nojló.

¹⁰Nujña'á papera kaje riliyá, rejomi nojñá riká. Munumunú jalá ke pumeka ra'apaka nunuma chu; nojmílo'oka riká ejomi, rila'ó ka'amani nowó chojé. ¹¹Rejomi riwakára'a nuká nakaje i'imajikare

yukuna i'imajé ajopánajlo, nawe'epíkaloje mékeka ina'uké la'ajiko ajopana te'eré nakú, ajopana te'eré nakú ke. Mékeka ri'imajika ajopana, ajopana ke, nakiyánajlo yukuna riwakára'a kaja nu'umaká; mékeka ri'imajika ajopana, ajopana ke, pura'akó chu pura'ajeñojlo yukuna, riwakára'aka kaja nu'umaká; mékeka ri'imajika ajopana, ajopana ke wakára'ajeñojlo yukuna, riwakára'a kaja nu'umaká najló.

11 ¹Rejomi apú a'arí nojló nakaje jená ña'ajona, kutiwá ke ri'imaká. Rimá nojló: “Pácho'o, piji'ichá Tupana ñakaré wapheréchaka jená; pijña'á kaja mesa richu to'okó jená; pilapa'atá kaja ina'ukena, mekeleka neká la'año pu'ují napéchuwa Tupana nakú richu. ²Kurara chipúka'ari Tupana ñakaré nakuwá jená unká pijña'alaje, unká we'epílaño Tupana nakojejló penaje riyurejo. Neká i'imajeño Tupana le'ejé pajimila e weji kele jarechí, eyá apú pe'iyojé ketana. Chapú nala'ajika neká re. ³Eyá nuká wakára'aje iyamá nuyukuna i'imajeño rejo riwakajé. Costal kaje i'imajeri na'arumaká, ajopana we'epíkaloje raú kamu'ují napechu i'imaká. Kamu'ují napechu i'imajika, unká paala ajopana la'ajíkale neká rewá. Naketana júpika nuyukuna i'imajeño ja'apátajika najló Tupana puráka'alo yukuna, weji kele jarechí, eyá apú pe'iyojé ketana”, ke rimaká.

⁴Iyamá nuyukuna i'imajeño, iyamana a'awaná olivos ke. Iyamá rikamaré tára'ako Tupana jimaje, ke kaja neká. Tupana le'ejé piyukeja eja'awá. ⁵Chapú nanaku péchuruna la'ajika ee chapú neká, kera'athani jeño'ojé nanuma chiyá, riká aú nakapichátaje neká. ⁶Tupana kemari najló napuráka'alo aú, juni ja'akó piyá, na'apátaka ina'ukejlo Tupana puráka'alo ketana. Juni jeño'okare te'erí e'iyayá muthú chiyá, kaje wa'ató unká kaja jeño'olaje re'iyayá. Nawakára'aje kaja juni jewíña'ako jirá penaje. Tupana kemari kaja najló, nawakára'akaloje ina'uké amaka chapú kaje yajwé, nemájika rinaku ke.

⁷Nañapátajika Tupana puráka'alo ja'apátakana ina'ukénajlo ejomi, kamejeri kajruni wani jácho'ojero ulawí matajnáka'aru chiyá najwa'até nókajo. Riká chá'atajeri neká, iyamá nuyukuna i'imajeño, rinoje neká. ⁸Tupana le'ejé pajimila e'iyá, iñe'epú i'imakare chu, natami pitajó. Riká pajimila e kaja nenó Nawakára'ajeri wani i'imaká. Mapeja na'aká riká pajimila íí Sodoma, ke, eyá ñaké kaja Egipto, ke. ⁹Weji ke kala, eyá apú pe'iyojé ketana, natami pitajiko re iñe'epú chu. Piyukeja ina'ukena eja'awá chu i'imakaño yaká'ajiko natami chaje. Ajopana te'eré, ajopana te'eré eyájena ke, yaká'ajeño natami chaje. Apú, apú chu

ke, pura'akaño yaká'ajeño kaja natami chaje, unká nayurílaje natami ja'akana. ¹⁰Piyukeja ina'ukena, eja'awá chu i'imakaño, pechu i'imajika pu'ují nataka'ajika aú, napachá ina'uké amákale kajrú chapú kaje yajwé. Ñakele nataka'ajika wakajé, nala'ajé fiesta najluwa; na'ajé kaja nakaje pajlokaka raú.

¹¹Weji ke kala, apú pe'iyojé ketana, ja'apájeri, rejéchami Tupana pa'atájika piño najló kajmuchaji. Raú taka'año penájemina jácho'ojeño piño tára'ajo; raú kajrú wani amájeño namakápo'oko kero'ojiko. ¹²Rejomi puráka'aloji kemájeri je'echú chiyá najló: “Majó i'ijná”, ke. Raú juni juwáka'ala wá'ajeri neká je'echú chojé. Chapú péchuruna nanaku ijlu chuwa ja riwá'aje neká ne'iyayá.

¹³Rejéchami te'erí ñaka'ajiko kaphí wani, rapichátaje pajimila nakiyana. Iyamá thé'ela keke nakaje i'imajíkare nakiyana, pajluwa apichájeri. Ají ke pajluwano, pajluwano ke, nakaje iyamá thé'ela keke i'imajíkare nakiyana apichájiko. Ñaké kaja siete mil ina'ukena kapichájiko raú. Najlupemí yuríjikaño i'imajeño kero'okajo nakú kajrú, rejéchami napura'ajiko Tupana, je'echú chu i'imakare, nakú palá. Piyukeja nakaje riwe'epíkare la'akana nakú napura'ajó kaja palá. ¹⁴Kaja namá chapú kaje wani yajwé iyaampe la'aká. ¡Eko pamá! Meketana i'imajémija namaje piño apú chapú kaje wani yajwé, weji ke pe la'aká ri'imajika.

¹⁵Eyá Tupana wa'atéjeri, iyamá kuwá'ata keke la'aká, apho'orí piño riluwiluwine chojé. Rejéchami kaphí wani napuráka'alo jema'akó je'echú chiyá, nemá:

“Chuwaka, wawakára'ajeri Tupana i'imajika piyukeja eja'awá churuna wakára'ajeri.

Matajnako ri'imajika nawakára'akana nakú.

Ri'irí, riwakára'akare eja'awá chojé i'imaká

ina'uké i'imatájeri penaje,

wakára'ajeri kaja rijwa'até”,

ke nemaká. ¹⁶E veinticuatro pheñawilana yá'año tujlá ke Tupana nakoje, láma'año najimá aú Tupana nakoje, pu'ují napechu i'imakale rinaku. ¹⁷Nemá rijló:

“We'emakana Tupana, wapechu i'imakare chojé kaphí, piká.

Piyuke la'ajeri piká.

Piká i'imari me'etení;

piká kaja i'imari júpimi i'imaká.

Palá pila'aká weká.

Piká we'epiri piyukeja nakaje la'akana.

Chuwaka, piyukeja ina'ukena wakára'ajeri piká.

¹⁸Unká we'epilaño piká yúcha'año raú.

Chuwa piwajájika neká, kaja taka'akaño wa'ató,
piwajaje pu'uwaré nala'akare chona.

Chuwa, pa'ajika pijwa'até jápajeñojlo riwemí,

Pipuráka'alo ja'apátajeño pijwa'até jápajeño.

Pa'ajé kaja piyuke pa'apí iphájeñojlo riwemí.

Re pa'apí iphájeño: kajrú péchuruna,

wejapa péchuruna, kele neká.

Najló piyukeja pa'ajé riwemí.

Chuwa, kaja riphaka pu'uwaré la'ajeño kapichátakana jená
chojé:

Pu'uwaré la'akaná nakuja ne'emá eja'awá chu i'imaká",

ke nemaká Tupánajlo. ¹⁹Eyá najme'etá Tupana ñakaré numaná,
je'echú chu i'imakare. Najme'etaka aú riká, kajrú pichaní kamaré
ja'akó majó; kajrú pichaní mejé jema'akó richiyá, raú kajrú te'erí
ñaka'akó. Kajrú juni taka'átakanami ja'akó richiyá majó. Tupana
ñakaré chu kaichama kaje i'imari, riká chu Tupana puráka'alo
lana'akéjami jipa nakú i'imari.

Inanaru, eyá lánawaru yukuna marí

12 ¹Rejomi nomá je'echú chu nakaje apú kaje wani. Nomá
pajluwájaru inanaru. Kamú i'imari ro'orumaká ke, eyá
keri i'imari ru'umá ja'apí, ruwíla'aru nakú rupútena i'imá. Rinaku
iyamá iphata ji'imaji nakojé kele iwijrina i'imaká. ²Kaja riphá
rená chojé rojló, ruwá'akaloje ru'urí penaje, raú kajrú rowíyo'oka,
kewini yajwé romákale. ³E apú, kajruni wani ri'imaká, ya'ataró
rojló je'echú chiyá majó. Kajruni wani lánawaru ke ri'imaká;
kerani rinaku i'imaká; iyamá kuwá'ata kele riwíla'aru i'imaká;
iyamá thé'ela kele kaja ri'iwawi i'imaká; pútenaji ke i'imari kaja
piyuke riwíla'aru kele nakú. ⁴Rijipí aú richíra'a iwijrina je'echú
chiyá, rika'akáloje neká marí eja'awá nakojé. Pe'iyó ja'apejé
rika'á piyuke iwijrina nakiyana marí eja'awá nakojé. Rejomi
ritára'o inanaru yewicha wá'akayo ru'urí awa'ajé, rajñákalaje
ru'urí, ruwá'ajika riká ejomi penaje. ⁵E kaja ruwa'a ru'urí, achiñá
ri'imaká. Piyukeja ina'ukena eja'awá chu i'imakaño wakára'ajeri
penaje ri'imaká, riwakára'akaloje neká kaphí penaje. Ramako
ralojlo ejomi, Tupana wá'ari riká je'echú chojé, ri'imakáloje rawa'á
penaje. ⁶Eyá ilerú inanaru ñaayó pu'utheni chojé. Pukunaji,
Tupana lamá'atakare rojló i'imaká, ejo ruñaó. Re ra'á rinakojó
ruká weji kele jarechí, eyá apú pe'iyojé ketana.

⁷E kaja nakeño'ó pajwa'atéchaka nókakajo je'echú chu. Tupana
wa'atéjena, je'echú chu i'imakaño, wakára'ajeri íi i'imari Miguel.

Riká, rijwa'atéjena wa'até, nókaño lánawaru kaje wa'até. ⁸Unká nachá'atala riká, unká kaja pukunaji i'imalá najló je'echú chu.

⁹Kaja naka'á riká lánawaru kaje je'echú chiyá. Kajruni wani ri'imaká, jeí chi'inárikana ri'imaká. Riká íí Jiñá Chi'inárikana, Satanás. Kajrú ripajlaka piyuke ina'ukena eja'awá chu i'imakaño wa'até. Riká naka'á je'echú chiyá, rijwa'atéjena wa'até.

¹⁰Rejomi noma'á kaphí puráka'aloji marí ke:

“Kaja chuwa, Tupana i'imatájika ina'uké kapichákajo liyá.
Chuwa, Tupana i'imajika piyukeja ina'ukena wakára'ajeri.
Chuwa riká, riwakára'akare eja'awá chojé i'imaká ina'uké
i'imatájeri penaje, wakára'ajika kaja rijwa'até.

Kaja naka'á je'echú chiyá Jesucristo ja'apiyá jema'ajeño arukátajeri.

Wa'ajini wani rarukátaka Tupánajlo neká.

¹¹Jesucristo ja'apiyá jema'ajeño chá'ataño Jiñá Chi'inárikana, Jesucristo taka'akale nachaya a'awaná apiyá'akanami nakojé i'imaká.

Nachá'ata kaja riká kewákaje puráka'aloji aú.

Riyukuna ne'emá ajopánajlo.

Unká nawe'epila khaí nanakuwá.

Ajopana ka'ajná wátaño nenókana,
nema'akale Jesucristo ja'apiyá.

E'iyonaja unká nayurila naliyó ra'apiyá jema'akana.

Ilé kajena chá'ataño Jiñá Chi'inárikana.

¹²Eyá rimá piño je'echú churúnajlo,

napechu i'imakáloje pu'ují penaje.

Chapú wani ri'imajika eja'awá chu i'imakáñojlo,

juni jalomi jakuwá i'imakáñojlo wa'até,

Jiñá Chi'inárikana witúka'akale rejoyo.

Yurí ri'imajika, riwe'epíkale meketánaja ri'imajika re jo'ó kaja”.

¹³Kaja lánawaru kaje we'epí naka'aká riká je'echú chiyá eja'awá nakojé. Raú rikeño'ó inanaru, wá'ayo ru'urí i'imaká penájemiru, jecho'ótakana. ¹⁴Tupana a'arí rojló iyamata yupheji, rojrakaloje desierto chojé raú. Perú kajruni wani yuphé, ke ruyuphé i'imaká. Desierto chu ru'umá weji kele jarechí, eyá apú pe'iyojé ketana. Palá Tupana a'aká rinakojó ruká, jeí chi'inárikana liyá. ¹⁵E jeí chi'inárikana yurí kajrú juni jeño'oká rinuma chiyá, rapichátakaloje ilerú inanaru raú penaje. ¹⁶E'iyonaja te'erí a'arí ruñathé, riká ajmílo'ori juni jeño'okare lánawaru kaje numá chiyá. ¹⁷Ilé kaje aú lánawaru kaje yúcha'aro íki'ija wani inanaru cha, raú ri'ijná piño rulakénami wa'até nókajo. Ri'ijná Tupana ja'apiyá

jema'ajeño, Jesucristo puráka'alo ja'apiyá jema'ajeño, kele wa'até nókajo. ¹⁸Eyá lánawaru kaje tára'aro juni jalomi turenaje.

13 ¹Rejomi nomá kamejeri apú kaje wani jácho'oko juni jalomi jakiyá. Iyamá thé'ela kele ri'iwawi i'imaká; iyamá thé'ela kele pútenaji kaje pato'oro ri'iwawi nakú; iyamá kuwá'ata ka'alá wíla'aruri ri'imaká. Rií pu'uaré nojé wani i'imari lana'akéjami pajluwano, pajluwano ke, riwíla'aru nakú. Pu'uaré wani ilé kaje i'imaká Tupana nakú. ²Riká kamejeri kaje nomákare, amaro yawi eja'awá e'iyowaje ke. Ri'imá i'imari oso ji'imá ke; rinuma i'imari león numá ke. Ilé lánawaru kaje a'arí rijló ripechu, riwakára'akaloje rijwa'atéjena, riwakára'aka ríle'ejena ke kaja penaje. ³Ilé kamejeri wíla'aru nakiyana nenó pajlúwa'ala, raú napechu nakú i'imá: “Kaja pajlúwa'ala riwíla'aru taki'ichá”, ke, e'iyonaja ripala'ó piño palá rapumí chuwá. Raú piyuke ina'uké pechu i'imá: “¡Meke piyuke wani rila'alaka!”, ke, raú nakeño'ó ra'apiyá jema'akana. ⁴Kajrú ina'ukena eja'awá chu i'imakaño pechu i'imaká pu'ují riká lánawaru kaje nakú, ra'akale riká kamejérijlo ripechu, riwakára'akaloje raú penaje. Pu'ují kaja napechu i'imaká ilé kamejeri kaje nakú, raú nemá rinaku: “Unká na i'imalá riká ke, unká kaja na kalé chá'atarijla riká nókakajo aú”.

⁵Tupana yuriri ilé kamejeri kaje pura'akó pu'uaré wani; riyurí kaja ri'imaká eja'awá chu i'imakaño wakára'ajeri. Weji kele jarechí, eyá apú pe'iyojé ketana, ri'imaká nawakára'ajeri. ⁶Pu'uaré wani ripura'akó Tupana nakú; pu'uaré kaja ripura'akó je'echú, Tupana i'imakare e, nakú; piyuke richu i'imakaño nakú wa'ató ripura'ó kaja pu'uaré wani. ⁷Rinókako kaja Tupana le'ejena ina'ukena wa'até. Richá'ata neká; riwakára'a kaja piyuke ina'ukena; piyuke riwakára'aka ajopana, ajopana ke. Ajopana, ajopana ke, te'eré eyájena wakára'ajeri ri'imaká; ri'imá kaja apú, apú chu, ke pura'ajeño wakára'ajeri. Unká Tupana italá rijló rapu, ri'imaká piyá ñaké rijló. ⁸Piyukeja ina'ukena, eja'awá chu i'imakaño unká wátalaño Tupana ja'apiyá jema'akana, pechu i'imaká pu'ují rinaku. Unká kaja neí i'imalá lana'akéjami, Jesucristo wa'atéjena chaya nenókare i'imaká, papérane chu. Unká chiyó Tupana keño'ota eja'awá, riwe'epí mékajenaka i'imajika ríle'ejena ina'ukena. Riwakajé eyá, re neí i'imá kaja lana'akeja ripapérane chu. Ripapérane chu lana'akéjami íi i'imakaño, i'imajeño matajnako rijwa'até je'echú chu.

⁹Jema'á palá ra'apiyá.

¹⁰Tupana we'epiri mékajenaka napatájika ne'iyayá,

naka'akáloje neká ina'uké wajákelana chojé penaje;
nekaja kalé napataje.

Tupana we'epiri kaja mékajenaka nenójika;
nekaja kalé nenoje ne'iyayá.

Ñakele numá Tupana le'ejena ina'ukénajlo: I'imá kawajwéruna;
ipechu i'imá kaja kaphí Tupana chojé.

¹¹Rejomi nomá piño apú kamejeri kaje jácho'oko te'erí e'iyayá. Iyamá ri'iwawi i'imaká kapajé nojé; oveja i'irí i'iwawi keja ri'iwawi i'imaká kapajé nojé. Lánawaru kaje pura'akó, ke kaja ripura'akó. ¹²Riká kamejeri, junápiya jácho'oko, awa'á ri'imá. Kaphí riwakára'aka ajopana ra'apiyá ke. Tejmuji aú riwakára'a piyuke ina'uké pechu i'imaká pu'ují riká, kamejeri junápiya jácho'oko, nakú. Nenókare pewíla'aruya, kaja pala'akó i'imaká penájemi ri'imaká. ¹³Riká kamejeri, te'erí e'iyayá jácho'oko, la'arí kajrú nakaje, unká méño'oyo ajopana la'alare kaje. Riwitúka'ata kera'athani je'echú chiyá eja'awá nakoje. Piyuke ina'uké e'iyajé riwitúka'ata riká najimaje. ¹⁴Rila'á kajrú nakaje, unká méño'oyo ajopana la'alare kaje, raú ripajlá piyuke ina'ukena eja'awá chu i'imakaño wa'até. Riká kamejeri, junápiya jácho'oko, awa'á rila'á nakaje, unká méño'oyo ajopana la'alare kaje. Kamejeri, te'erí e'iyayá jácho'oko, wakára'ari piyukeja ina'uké la'aká nakaje jenami. Palá napechu i'imaká kamejeri kaje junápiya jácho'oko nakú. Ra'apí iphákana aú nala'á renami i'imaká. Nenó ri'imaká jo'ojoji aú, e'iyonaja unká ritaka'alá. ¹⁵Nala'á ilé kamejeri junápiya jácho'oko jenami, rejomi nayurí rapho'oká rikaéjane renami chojé, raú riyuró kajmuni. Rejéchami ripura'akó. Unkachu ina'uké pechu i'imaké pu'ují rinaku, rinoke neká. ¹⁶Riwakára'ake tejmuji aú piyukeja ina'ukena. Kajrú péchuruna, wejapa péchuruna, kamu'ují la'akaño, kajrú la'akaño, ajopana wa'até jápajeño, najluwa jápajeño, neká piyukeja wani riwakára'ake tejmuji aú. Nayáthe'ela ka'añá chojó pitá yaré na'á, napulá nakuwá wa'ató. ¹⁷Unkachu ilé kamejeri íí i'imalá nayáthe'ela nakú lana'akéjami, napulá nakú wa'até, unká nayurike nawarúwa'aka nakaje. Unká kaja nayurila na'aká nakaje riwemí aú. Nalana'á ilé íí ka'ajná, rile'ejé lapa'atákaje ka'ajná, ina'uké yáthe'ela nakú, napulá nakú wa'ató.

¹⁸Kapechúruna i'imakaño we'epiño rile'ejé lapa'atákaje nakoje rií we'epíkana aú, rií keja kaja lapa'atákaje. Rile'ejé lapa'atákaje i'imari seiscientos sesenta y seis (666).

14 ¹Rejomi nuyaka'o piño, amari Jesucristo tára'ako
Jerusalén e. 144,000 rijwa'atéjena i'imaká. Rií, Rara'apá

íi wa'até, i'imari lana'akéjami rijwa'atéjena pulá nakú. ²E puráka'aloji jema'aró je'echú chiyá. Kajruni wani jipa mejé jema'akó, ke rinúrupi mejé i'imaká; kajrú pichaní majáka'ako mejé jema'akó rijwa'até. Kajrú ina'ukena wara'aká guitarra kaje nakú mejé jema'akó, ke rinúrupi mejé jema'akó. ³E kaja rijwa'atéjena, neká 144,000 i'imakaño, tára'año nawakára'ajeri jimaje. Pa'u kele kajmuruna, eyá pheñawilana tára'año kaja najwa'até rijimaje, e nataní Tupana yale rijló. Wajé yáleje ri'imaká; neká, Ri'irí taka'akárena chaya, keleja we'epiño riyale. ⁴Palá la'akaño ne'emaká; achiñana, unká la'alaño namanáicho inaana wa'até, ne'emaká. Ne'ejnaké Jesucristo wa'até ri'ijnajika ejo. Nachaya Jesucristo taka'á i'imaká, raú Tupana warúwa'a ne'emaká ajopana eja'awá chu i'imakaño e'iyayá. Ajopana piyá ri'imatá ne'emaká kapichákajo liyá, ne'emakáloje Tupana, Ri'irí Jesucristo wa'até, le'ejena penaje. ⁵Unká wani kaja napajlala; unká kaja nala'alá pu'uwaré.

⁶Rejomi nomá piño Tupana wa'atéjeri, je'echú chiyaje, ajraka yenuwa wani. Tupana puráka'alo ra'apata eja'awá chu i'imakáñojlo; Tupana i'imataka iná kapichákajo liyá Jesucristo palamane aú yukuna ra'apata najló, unká riyukuna kapichálajo. Piyukeja ina'ukena marí eja'awá chu i'imakáñojlo ri'imá riyukuna; ajopana, ajopana ke, nakiyánajlo ri'imá kaja riyukuna; apú, apú chu ke, pura'ajéñojlo ri'imá kaja riyukuna; ajopana, ajopana ke, te'eré erúnajlo ri'imá kaja riyukuna. ⁷Kaphí wani rimaká najló: “Iphá Tupana ja'apí, ipura'ó kaja palá riwe'epíkare la'akana nakú. Kaja chuwa, rimájika piyukeja ina'uké nakú pajluwano ke, mékeka nala'akana i'imajika. Ipechu i'imá pu'ují la'arí je'echú, eja'awá, juni jalomi, piyuke apú juni wa'até i'imaká, nakú. Rinaku ipechu i'imá pu'ují”, ke rimaká.

⁸Apú Tupana wa'atéjeri, je'echú chiyaje, pura'aró piño rapumí chojé. Riká kemari: “Pajimila Babilonia kapicharo i'imaká. Marí ke i'imakaño, pajimila eyájena i'imaká: Napichátake ajopana, ajopana ke pechu; pu'ují napechu i'imajika nakaje jenami nakú, nachí'inárikana ke ri'imakale najló. Namata kaja ajopana, napechu i'imakáloje ñaké kaja pu'ují rinaku najwa'até, raú napichátake napechu; namata kaja ajopana, ajopana ke, namanáicho la'akana aú. Ke nala'ajika”, ke rimaká.

⁹⁻¹⁰E kaja apú Tupana wa'atéjeri, je'echú chiyaje, weji kele la'aká, i'ijnari kaja ajopana iyamá ápumichu. Kaphí wani rimaká: “Pu'ují péchuruna i'imakaño ilé kamejeri nakú, amájeño chuwa Tupana yuchá yajwé. Re rií lana'akéjami napulá nakú, nayáthe'ela

nakú wa'até. Íki'i wani Tupana yúcha'ako nachá; kera'athani, azufre wa'até, yajwé namaje chuwa. Jesucristo, rijwa'atéjena, je'echú chiyájena, kele jimaje namaje riyajwé. ¹¹Namaka ima'aní yajwé eyá ija jácho'oro, matajnako rácho'ojiko reyá. Wa'ajini wani namájika ima'aní yajwé re, unká rima'áhare watána'atalaje neká. Ilé ke ri'imajika najló, pu'ují napechu i'imajíkale ilé kamejeri kaje nakú. Ríí i'imajeri kaja lana'akéjami nanaku; pu'ují napechu i'imajika renami nakú, rinakojé la'akanami ri'imajika”, ke rimaká.

¹²Ilé ke ri'imajíkale, numá Tupana ja'apiyá jema'ajéñojlo: I'imá kawajwéruna Tupana ja'apiyá jema'akana nakú. Tupana le'ejena ina'ukena a'año Ripuráka'alo nanakojó, unká nayurila Jesucristo ja'apiyá jema'akana.

¹³E puráka'aloji jema'aró piño je'echú chiyá, rimá nojló: “Pilana'á marí papera kaje chojé: ‘Maáreya a'ajná ño'ojó, ina'uké nakiyana jema'ajeño Jesucristo ja'apiyá. Ra'apiyá jema'ajeño ne'emajika, a'ajná nataka'ajika ejená. Pu'ují péchuruna ne'emajika, Tupana la'ajíkale neká palá’.

“ ‘Ke jo'ó’, ke Tupana Pechu a'ajipaká rijló. Chuwa nawatána'ajika najápaka'ala liyá. Kajrú najápaka i'imaká. Chuwa je'echú chu re najló palá nala'akare wemí”, ke Tupana Pechu kemaká nojló.

¹⁴Rejomi nuyaka'o piño, nomá juni juwáka'ala jareni, rinaku nomá na pajaká yá'ako. Ina'uké i'imajíkare palamane ke ramákana i'imaká. Pútenaji oro nakiyá la'akanami i'imari richá; jajalu kaje pu'uwení i'imari kaja rikapi. ¹⁵Rejomi nomá apú Tupana wa'atéjeri jácho'oko Tupana ñakaré chiyá, e awíyo'okeja rimaká juni juwáka'ala nakú yá'akojlo: “Chuwa pijápajika ilé pijajálune aú, piji'ichá nakaje icha eja'awá e'iyayá, kaja richa ña'akana eja'awá e'iyayá iphicha rená chojé”, ke rimaká.

¹⁶Raú riká, juni juwáka'ala nakú yá'ako, mata'arí richa. Pajlúwa'ama aú ja rijña'á richa eja'awá e'iyayá. ¹⁷Rejomi nomá piño apú Tupana wa'atéjeri jácho'oko Tupana ñakaré chiyá. Jajalu kaje pu'uwení i'imari kaja rikapi.

¹⁸E kaja apú Tupana wa'atéjeri ja'apari mesa awa'ayá. Kera'athani minárikana ri'imaká. E awíyo'okeja rimaká kaphí wani jajalu pu'uwení i'imakare kápijlo: “Chuwa pimata'á pijajálune aú kajmú kaje, eja'awá chu i'imakare, icha. Kaja rapará chuwa”.

¹⁹E rijajálune aú rimata'á richuwaja piyuke kajmú kaje, eja'awá chu i'imakare, icha. Rejomi rika'á riká ralá apáka'aruna chojé. Íki'ija wani Tupana wajájika ina'uké, kemakánaka ri'imaká.

²⁰Napa'á kajmú kaje jalá re'iyayá ralá apáka'aruna chojé pajimila

yámojo. Raú nérami i'imari kajrú wani rewá, kaéja ke. Kawarú tára'ako ra'ata ja'apejé ketana juniphuka nérami i'imaká.

Trescientos kilómetros ketana ewá richipúka'o.

15 ¹Rejomi nomá piño apú nakaje, unká wani iná amálare, kaje. Nupechu i'imá: “Meke piyuke wani kaji”. Nomá iyamá kuwá'ata kele (7) Tupana wa'atéjena, je'echú chiyájena. Pajluwano ke nakaje i'imaká nakapi yaripu waja, raú nawajákaloje unká jema'alaño Tupana ja'apiyá penaje, raú natajnátakaloje kaja penaje Tupana yuchá penaje. ²Rejomi nomá kajruni wíluru kaje kera'athani wa'até to'okó. Kajruni, juni jalomi ke ri'imaká. Rawa'á ajopana ina'ukena tára'año. Unká jema'alaño ilé kamejeri junápiya jácho'oko i'imaká, ja'apiyá ne'emaká; unká kaja napechu i'imalá pu'ují renami nakú; unká kaja rile'ejé lana'akéjami i'imalá nanaku. Neká tára'año, guitarra kaje Tupana a'akare najló, nakapi ke.

³Re ne'emá Moisés, Tupana wa'até jápajeri, yale jataníkana nakú Tupánajlo, nataní kaja Tupana i'irí yale marí ke:

“Wawakára'ajeri Tupana. Piyukeja la'ajeri piká,
palani wani nakaje pila'akare.

Piyukeja ina'ukena wakára'ajeri kaja piká,
palá nojé nakaje pila'akare.

Kewákaje pipuráka'alo.

⁴Wawakára'ajeri, piyukeja ina'ukena iphaka pa'apí.

Na'apata kaja piyuke nakaje pila'akare yukuna ajopánajlo.

Pikaja kalé, pajluwaja, unká la'alá pu'uwaré.

Piyuke ajopana, ajopana te'eré eyájena ke waícha pijimaje,
napechu i'imakáloje pu'ují pinaku penaje.

Pu'ují napechu i'imajika pinaku,
namákale palá pila'akare i'imaká”,

ke natanika. ⁵Rejomi nomá Tupana ñakaré je'echú churí, e nomá rinumaná me'etako. Richu nomá ukapú, Tupana puráka'alo

lana'akéjami i'imakare chu. ⁶Rejomi nomá Tupana wa'atéjena, je'echú chiyájena, iyamá kuwá'ata kele mujlúka'aka richiyá majó.

Nakaje i'imari nakapi, nawajákaloje ina'uké raú penaje, unká jema'alaño Tupana ja'apiyá wajájona penaje i'imari nakapi. Jaré nojé, palá nojé, na'arumaká i'imaká. Wachaphilaji kaje chipúka'ari

ne'ekú nakuwá, oro nakiyá la'akanami ri'imaká. ⁷E pajluwaja, kajmuruna nakiyana i'imakaño, a'arí Tupana wa'atéjenajlo tiyela

kaje. Iyamá kuwá'ata kele rijwa'atéjena i'imaká. Ra'á najló tiyela apú, apujlo ke, oro nakiyá la'akanami ri'imaká. Unká tajnákajo

penaje kalé Tupana. Riká yúcha'aro ina'uké cha, unká pachá nema'alá ra'apiyá, richona riwajaje neká. Nawajájona i'imari tiyela

nakapi i'imakare chu. ⁸Piyuke la'aká Tupana. Kajrú ija i'imaká riñakaré chu. Iyamá kuwá'ata keke rijwa'atéjena wajaño neká, unká jema'alaño ra'apiyá. Nawajájika neká ketana, unká na kalé mujlúka'ajerijla Tupana ñakaré chojé.

16 ¹Rejomi puráka'aloji jema'aró Tupana ñakaré chiyá, rimá iyamá th'éla keke Tupana wa'atéjenajlo: “Chuwa i'ijná, ijláma'atiya iyamá kuwá'ata ka'alá tiyela chiyá Tupana yuchá eja'awá nakoje”. ²Raú Tupana wa'atéjeri, natukumá tára'ako, láma'ari ritiyélane chiyá Tupana yuchá eja'awá nakoje, raú pacháka'aloji nóteri neká. Pu'ují péchuruna kamejeri jenami nakú i'imakaño ne'emaká, rií i'imari kaja lana'akéjami nanaku. Neká penájemina i'imakaño pacháka'aloji nota piyukeja nanapona nakuwá napachó, kewini wani ri'imaká.

³Rejomi apú Tupana wa'atéjeri, iyamá la'aká, láma'ari piño ritiyélane chiyá juni jalomi jakojé. Raú riyuró jirá ke, raú piyuke juni yajné taka'atako. ⁴Rejomi apú Tupana wa'atéjeri, weji ke la'aká, láma'ari piño ritiyélane chiyá apú juni jakojé. Ina'athana, muthú kaje wa'ató jakojé rijláma'a riká, riká aú riyuró kaja jirá ke. ⁵E Tupana wa'atéjeri, juni minárikana ri'imaká, kemari Tupánajlo:

“Palá piwajaka ilé ke neká.

Unká la'alá pu'uwaré piká.

I'imajeri wani piká; piká i'imari i'imaká.

Re kaja piká me'etení.

⁶Neká piwajákarena me'etení nókeño pile'ejena ina'ukena.

Nenoke pipuráka'alo ja'apátajeño michuna,

kajrú nérami i'imajika rewá.

Chuwaka piká a'ajeri nanuma jirá kaje,

ne'erakáloje riká penaje.

Chapú nala'akare ajopana i'imaká ejé piwajaje neká”, ke rimaká Tupánajlo. ⁷E noma'á puráka'aloji mejé keño'ótako altar eyá, riká kemari Tupánajlo: “Wawakára'ajeri, wapechu i'imakare chojé kaphí, piyukeja la'ajeri kaja piká. Palá pila'aká neká nawajákana aú”.

⁸Rejomi apú Tupana wa'atéjeri, pa'u keke la'aká, láma'ari piño Tupana yuchá kamú nakoje, raú ripatá ima'á wani, mapeja rikára'ataka ina'uké. ⁹Kajrú nakára'atako raú. Ilé ke nala'akó e'iyonaja, unká napajno'otala Tupana ejo napéchuwa, pu'uwaré nala'akare liyá raú. Kajrú napura'akó pu'uwaré Tupana nakú; napura'ó pu'uwaré unká we'epila ilé kaje la'akana nakú.

¹⁰Rejomi apú Tupana wa'atéjeri, pajluwa th'éla keke la'aká, láma'ari Tupana yuchá ilé kamejeri, junápiya jácho'oko cha, raú

piyuke rijwa'atéjena yuriko kalajeruni chu. Namá kaja kewini wani yajwé, akuwaná najma'atá nalenawa. ¹¹ Ilé kaje yajwé namaka e'iyonaja, unká kaja napajno'otala napéchuwa Tupana ejo, pu'uwaré nala'akare liyá. Apo'ojó nala'aká: napura'ó pu'uwaré Tupana, je'echú chu i'imakare, nakú, namákale chapú kaje yajwé.

¹² Rejomi apú Tupana wa'atéjeri, pajluwaja kuwá'ata kele la'aká, láma'ari piño Tupana yuchá, ritiyélane chiyá juni chi'itaje Éufrates jakojé, raú rimakára'o, napu me'etákolaje penaje. Richuwá ajopana te'eré eyájena wakára'ajeño i'ijnaño nale'ejena suráana wa'até. Kamú jeño'oká eyá, nakeño'ó richuwá jácho'okano majó. ¹³ Rejomi nomá piño weji kele jiñana pechu, máwana keja namákana i'imaká. ¹⁴ Jiñana pechu, jácho'okarona numá chiyá, we'epiño nakaje la'akana, unká méño'ojo ajopana la'alare kaje. Weji kele jiñana pechu ne'emaká, i'ijnaño ajopana, ajopana ke, wakára'ajeño chaje. Ne'ejná nachaje, nawakátakalaje neká penaje, nenókakalaje Tupana wa'até. Riwakajé Tupana, we'epiri piyuke wani nakaje la'akana, wajájeri neká kajrú wani.

¹⁵ Jesucristo kemari: “Jema'á, nuká i'ijnajeri ka'ajno. Jata'akachi iphákachu nakaje jata'ajé, unká ra'alá renó, ñaké kaja nuphájika inaku, unká iwe'epílaje noná. Pu'ují nuwátajeño pechu i'imajika. Palá, unká i'imalaño pu'uwaré la'akana nakú, pechu; neká pechu i'imajeri nuphájika aú, unká kaja napáña'alajo no'opí nuphájika wakajé”, ke Jesucristo kemaká.

¹⁶ E kaja jiñana pechu awakátaño ajopana, ajopana ke, wakára'ajeño. Armagedón ejé nawakata neká. (Ke na'aká pukunaji íí hebréona pura'akó chu.)

¹⁷ E kaja apú Tupana wa'atéjeri, iyamá kuwá'ata kele la'aká, láma'ari piño Tupana yuchá ritiyélane chiyá. Rijláma'a riká ají ke kawakaje karená e'iyajé, rejéchami Tupana kemaká, “kaja”, ke. Mejrí wani ripuráka'alo mejé ja'akó majó riñakaré ri'imakare eyá. ¹⁸ Ilé ke rimaká ejéchami, kajrú pichaní apíro'oka je'echú jimawa, kaphí wani rimejé i'imaká, kajrú wani kaja eja'awá ñaka'akó raú. Tupana keño'ótaka ina'uké eyá, maárejecha unká eja'awá ñaka'aló ñaké. ¹⁹ Raú pajimila Babilonia tamáka'ato paliyáaka weji kele penaje. “Apú pajimila chaje riká”, ke nemájika riká pajimila nakú. Piyuke wani pajimila apú ewá, apú ewá ke, i'imakare eja'awá chu kapichako eja'awá ñaka'akó aú. Tupana we'epiri pu'uwaré nala'akare Babilonia e nakojé, pachá namá Tupana yuchá yajwé. ²⁰ Te'erí ñaka'akó aú paranakuwa kapichó kaja, ñaké kaja piyukeja ipuré kapichako raú. ²¹ Kajrú kaja juni taka'átakanami, kajrú nojé wani, ja'akó je'echú chiyá majó. Juni ja'akó, ke kaja ra'akó ina'uké

cha. Cuarenta kilos ewá pajlúwa'ala juni taka'átakanami jená ña'akó. Riká ja'aró je'echú chiyá majó, nótari ina'uké, raú pu'uaré wani nakha'aká Tupana maná, riwajákale neká íki'ija wani.

17 ¹Iyamá kuwá'ata kele Tupana wa'atéjenu, je'echú chiyájenu, i'imaká tiyela nakapi ke. Pajluwaja nanakiyana i'ijnari nowa'ajé, e rimá nojló: “Pi'ijná nujwa'até, nuya'atíyachi pijló mékeka Tupana wajájika pajimila nemakare nakú: ‘Apú pajimila chaje riká’, ke, eyájenu. Apú ewá, apú ewá ke, riká pajimila juni cho. Wapichá ke riká pajimila, ina'uké pechu i'imakale apo'ojó Tupana liyá napuráka'alo jimaje. ²Ajopana, ajopana ke, wakára'ajeño, piyuke eja'awá chu i'imakaño, i'ijnakeño rejoy. Re nala'aké pu'uaré namanáicho; Tupana apumí chojé ke, napechu i'imajika pu'ují apú nakaje nakú”, ke rimaká nojló.

³Tupana wa'atéjeri, je'echú chiyaje, wá'ari nupechu desierto chojé, re nomá inanaru yá'ako kamejeri kaje wajlé chu. Kerani kamejeri i'imaká, re lana'akéjami rinaku, kemari pu'uaré wani Tupana nakú. Iyamá kuwá'ata ka'alá riwíla'aru i'imaká, iyamá th'éela kele ri'iwawi i'imaká. Riká wajlé chu nomá inanaru yá'ako.

⁴Kerálukuni, ipurélukuni wa'até, ro'orumaká i'imaká. Kajrú kaja oro pato'okó ro'orumaká nakú, kawemí nojé jipa kaje pato'oró kaja rinaku; perlas kawemini wani pato'oró kaja ro'orumaká nakú. Tiyela oro nakiyá la'akanami i'imari rukapi; pu'uaré nojé wani nakaje i'imari richu; pu'uwareni puráka'aloji i'imari richu. Riká kaje puráka'aloji jimaje kajrú ina'ukena pechu i'imaká chapú Tupana nakú. ⁵Rupulá nakú i'imari kaja lana'akeja me'echuje puráka'aloji aú. Marí ke rimaká: “Babilonia nemakare nakú: ‘Apú pajimila chaje riká’, ke. Piyukeja wapichana jaló, ke riká pajimila. Reyá kaja kajrú apú kaje puráka'aloji jácho'o, ina'uké pajno'otákaloje napéchuwa Tupana liyá raú, ne'emakáloje apú kaje puráka'aloji ja'apiyá rilanakiya”, ke lana'akéjami kemaká rupulá nakú.

⁶E nomá ilerú inanaru yuwé'ako. Kajrú nenoka Tupana le'ejenu ina'ukena, nérami nakú ruyuwé'ao. Jesucristo ja'apiyá jema'ajeño ne'emakale, nenota ne'emaká. Pu'ují napechu i'imajika nenókana nakú.

Nomaka aú ilerú inanaru, nupechu i'imá: “¡Meke apú kajeru wani ruká!” ⁷E Tupana wa'atéjeri kemari nojló: “¿Naje ilé ke pipechu? Chuwa numájika pijló meke kemakánaka kele inanaru, eyá kele kamejeri kaje pamíchaje. Me'echuje riká. Ro'opá kamejeri kaje iyamá kuwá'ata kele wíla'aruri nakú, eyá iyamá th'éela kele ri'iwawi. ⁸Kamejeri pamíchaje kajmuni, kapichájero. Rejoy riká

penájemija kaja jácho'ojero piño ulawí, unká tajáka'alo i'imalá, chiyá majó; rejomi ri'ijnajé ají ño'ojó, nakapichátakaloje piño riká. Rácho'ojiko ulawí matajnáka'aru chiyá ee, kajrú ina'ukena amájika riká. Unká Tupana le'ejena kalé i'imakaño amájeño riká. Unká chiyó Tupana keño'ota eja'awá, rilana'á rile'ejena ina'ukena íi ripapérane chojé. Neká i'imajeño matajnako rijwa'até. Nanakiyana unká amálajeño ilé kamejeri kaje; ajopana nakiyana yaká'ajeño richaje, raú napechu i'imajé: ‘¡Meke piyuke wani rila'alaka!’ ”

E Tupana wa'atéjeri kemari piño nojló: “Ilé kamejeri kaje, pamíchaje kajmuni, kapichájero, e'iyonaja kalé ina'uké amaje piño riká.

⁹“Kapechúruna ina'ukena we'epiño meke kemakánaka kele kamejeri kaje, eyá kele inanaru. Re riwíla'aru iyamá kuwá'ata kele. Iyamá kuwá'ata kele yenuri ke riká, riká nakuwá pajmila to'oró. Pajmila ke kaja ilerú inanaru. Re kaja iyamá kuwá'ata kele nawakára'ajeño. ¹⁰Kaja naka'á pajluwa thé'ela kele nanakiyana, pajluwaja yuriro nawakára'ajeri me'etení, apú unká jo'ó i'imalá nawakára'ajeri. Ri'imajika ee, ri'imajé meketánaja kalé. ¹¹Ilé kamejeri kerani kaje, kajmuni i'imaká, kapichájero. Riká penájemi i'imajeri nawakára'ajeri piño. Iyamá kuwá'ata kele, apú ewá, apú ewá ke, ne'emaká nawakára'ajeño i'imaká. Riká i'imari kaja nanakiyana i'imaká; riká penájemi i'ijnajeri kaja a'ajná ño'ojó, rejo nakapichátaje riká”.

¹²Rimá piño nojló: “Iyamá thé'ela kele ri'iwawi pamíchaje kemakánaka: Iyamá thé'ela kele nawakára'ajeño, ke kaja riká. Unká jo'ó nakeño'olá ina'uké wakára'akana, meketánaja kalé ne'emajika nawakára'ajeño. Kamejeri kaje wa'até nawakára'aje. ¹³Iyamá thé'ela kele nawakára'ajeño i'imajika. Ñakeja kaja nawe'epíjika nakaje la'akana natukumó, ilé kamejeri kaje wátajika ke. ¹⁴Nenókajo Oveja i'irí wa'até. Riká, rijwa'atéjena wa'até, chá'atajeño neká. Palá jema'akaño ra'apiyá rijwa'atéjena; ina'ukena, ri'iwapakárena ajopana e'iyayá, neká; neká wa'até richá'ataje neká. Chá'atajeri wani Oveja i'irí; ajopana wakára'ajeño, ajopana wakára'ajeño ke i'imakaño, chaje riwakára'aka, ñakele richá'ataje neká”, ke rimaká.

¹⁵Tupana wa'atéjeri, je'echú chiyaje, kemari piño nojló: “Juni pamíchaje, apú, apú ke kemakánaka: ajopana, ajopana te'eré ke kaja riká; ina'ukena, ajopana, ajopana ke kaja kemakana riká; ajopana, ajopana ke nakiyana, ke kaja riká; apú, apú chu ke pura'ajeño, ke kaja juni pamíchaje. ¹⁶Iyamá thé'ela kele ri'iwawi pamíchaje, iyamá thé'ela kele nawakára'ajeño ke kemakánaka

riká. Nawakára'ajeño, kamejeri kaje, kele pechu i'imajeri chapú pajimila eyájena nakú. Napuráka'alo jimaje unká ina'uké wátalaje Tupana. Nakapichátaje pajimila piyukeja, unká na kalé yuréjero re. ¹⁷Tupana la'arí nawakára'ajeño pechu, nala'akáloje nakaje ripechu nakú ri'imaká ke penaje. Piyuke neká kemájeño ilé kamejeri kaje nakú, ri'imakáloje piyuke ina'uké wakára'ajeri penaje. Nakaje i'imajíkaja Tupana kemaká ke ejená ri'imajé nawakára'ajeri", ke rimaká.

¹⁸Rimá piño nojló: "Ilerú inanaru pamíchaje, pajimila nemakare nakú: 'apú chaje riká', ke ruká. Apú ewá, apú ewá ke, piyukeja nawakára'ajeño jema'ajika ilé pajimila nakiyá wakára'ajeri ja'apiyá", ke rimaká nojló.

18 ¹Ilé kaje ja'apaka ejomi, nomá piño apú Tupana wa'atéjeri witúka'aka je'echú chiyá majó. Nawakára'ajeri wani ri'imaká, riká patarí piyuke eja'awá nakoje. ²Kaphí rawíyo'oko, rimaká:

"Kaja nakapichata pajimila Babilonia,
nemakare nakú: 'Apú pajimila chaje riká', ke.
Chuwa re kajrú jiñana rewá.
Pu'uaré nojena kamejérina,
eyá maka'aphana, kajena rewá.
Chapú péchuruna neká ajopana nakú.

³Kaja nakapichata pajimila,
napichátaka pachá kajrú ina'ukena pechu.
Ajopana wakára'ajeño, ajopana wakára'ajeño ke,
jema'akeño riká pajimila nakiyana wakára'ajeri ja'apiyá.
Raú napajno'otá napéchuwa Tupana liyá,
ñakele nala'á pu'uaré.
Le'ejepelaji minaná apú eyájena, apú eyájena ke,
piyuke eja'awá chu i'imakaño, i'ijnatákeño nale'ejépela rejo.
Mawó rewá i'imakaño pechu i'imajika
nakaje warúwa'akana najluwa nakú.

Raú kajrú le'ejepelaji minaná ña'aká najluwa liñeru".

⁴E noma'á piño apú awíyo'oka je'echú chiyá.
Rimá: "Nujwa'atéjenajlo numá:
'Jácho'o riká pajimila eyá,
ila'aká piyá pu'uaré, imanáicho najwa'até rewá.
Ila'ajika ee pu'uaré najwa'até,
Tupana wajájeri iká, ajopana pu'uaré la'ajeño wa'até.
⁵Kajrú wani nala'aká piyukeja pu'uaré,
namanáicho wa'até, pachá Tupana wajájeri neká.

Maáreya a'ajná ño'ojó,
unká rijña'alaje neká panaku re jo'ó kaja.

⁶ Chapú nala'aká ajopana,
ke kaja Tupana la'ajika neká chapú.
Richaje wani rila'ajika neká chapú,
riwajájika neká wakajé.

⁷ Kajrú ke'iyapejé nakaje i'imajika najló.
Riwajaje neká, namákaloje chapú kaje yajwé rilokópa'ala'.
Napechu i'imaké nanakuwá: 'Nawakára'ajeño weká,
ñakele ajopana chaje weká.
Palá i'imakaño weká,
raú unká wamálaje chapú kaje yajwé',
ke napechu i'imajika nanakuwá.

⁸ Ilé ke napechu i'imakale nanakuwá,
mana'í chiyó namaje chapú kaje yajwé kajrú.
Kajrú kaja nanakiyana taka'ajika.
Kajrú kaja ina'uké taka'ajika me'epijí nakú riwakajé.
Kera'athani aú nakapichátaje riká pajimila.
Tupana wajájeri neká.
Piyuke we'epika nakaje la'akana riká;
nakaje minárikana ri'imakale",

ke rimaká. ⁹ Ajopana wakára'ajeño, ajopana wakára'ajeño ke,
piyuke eja'awá chu i'imakaño, amájeño pajimila kára'ako, raú
neyaje. Neká a'akeño nanakojó riká pajimila wakára'ajeño
puráka'alo, rilanakiya unká nema'alá Tupana ja'apiyá. Na'aké
kaja pajimila erúnajlo nakaje, nawátakare kaje, raú nácho'ota
kajrú líneru najluwa. Neká amájeño pajimila kára'ako. ¹⁰ Jukaja
ne'emajika reyá, kero'okajo nakú ne'emajé, namájikale najña'aká
chapú kaje yajwé panaku. Nemaje pajlokaka:

“¡Meke chapú wani,
mana'í chiyó wani namá chapú kaje yajwé!
Apú pajimila chaje ri'imaká.

Re i'imakaño amaño chuwa chapú kaje yajwé”,
ke nemájika rinaku pajlokaka. ¹¹ Ñaké kaja le'ejepelaji minaná
iyájika, unkale na kalé warúwa'aje naliyá nale'ejépela.

¹² Nawarúwa'ake naliyá oro, sereni kaje, jipa kapajé nojé,
kawemí nojé nejnewá penaje. Perlas kawemí nojé nawarúwa'ake
nala'ajowa penaje; palá nojé a'arumakaji, ipurélukuni lajnere,
seda, kaje maká nawarúwa'ake naliyá. Nawarúwa'ake kaja
naliyá a'awaná iká pu'umé amarí; nakaje jenami, palá nojé
kamejeri aími nakiyá la'akanami, kaje maká nawarúwa'ake

kaja naliyá. Nakaje palá nojé a'awaná nakiyá la'akanami, kaje maká nawarúwa'ake naliyá; nakaje pejru'uwá sereni nakiyá la'akanami, nakaje pejru'uwá nakiyá la'akanami, nakaje palá nojé jipa nakiyá la'akanami, kaje maká nawarúwa'ake naliyá. ¹³Na'aké kaja najló palá nojé nama a'ajona marí kaje: canela, especias, a'awaná iká, mirra, kaje; na'aké kaja najló i'irakaje, vino, nakaje jilami, harina, trigo, jémana pirakana, ovéjana, kawaruna, pe'iyowa ja'apaka, kaje maká na'aké najló. Nawarúwa'ake kaja naliyá ina'uké, najápakaloje najwa'até mawemiru penaje. Ilé ke le'ejepelaji minaná a'ajika najló nakaje.

¹⁴Namájika aú pajimila kapichako, nemaje: “Kaja palá nojé nakaje nawátakare i'imaká, kapicharo naliyá. Kajrú ke'iyapé nojé nakaje i'imaká re, palá nojé, kawemí nojé kaje, kaja kapicharo piyukeja naliyá, unká ri'imalaje piño”, ke le'ejepelaji minaná kemájika pajimila eruna nakú. ¹⁵Le'ejepelaji minaná awakátakeño najluwa kajrú liñeru, nakaje najló a'akana aú. Neká yuréjeño juká pajimila liyá; kero'okajo nakú ne'emajé, namájika aú najña'aká chapú kaje yajwé panaku re; kajrú neyájika pajimila eruna wa'até. ¹⁶Nemaje:

“¡Meke chapú wani nala'aká ka'ajná!
 Apú pajimila chaje ri'imaká.
 Palá nojé a'arumakaji reruna a'aké nanakuwá:
 ipurélukuni, kerálukuni wa'até
 rilajnere i'imaká palá nojé.
 Kajrú nala'ajowa pato'ojiko na'arumaká nakú,
 oro nakiyá la'akanami ri'imaká.
 Jipa kawemí nojé, wayajrú kaje nakiyá la'akanami,
 apú nala'ajowa i'imaká.
 Murewa kaje, perlas nakiyana la'akanami
 i'imari namurewane, nejnewá penaje.

¹⁷Mana'í chiyoja ilé kaje kapichako naliyá piyukeja”, ke le'ejepelaji minaná kemájika nanaku. ¹⁸Re wapuru kajrú nojé i'ijnari juni jalomi jakuwá. Richu i'ijnakaño, richiyá jápajeño, kele amájeño kaja kajrú ija jácho'oko pajimila e'iyayá, raú natajnajo juká riká pajimila liyá. Namájika aú kajrú rikára'atako, nemaje: “Unká wani apú pajimila i'imalá richaje”. ¹⁹Kamu'ují napechu la'ajiko, akuwaná naka'ajé nachó mu'upé, nemaje:

“¡Meke chapú wani!
 Apú pajimila chaje ri'imaká, kele.
 Reje kajrú wapuru arúka'ajikono.

Kajrú wapuru minaná awakátajika
najluwa liñeru rejoy ne'ejnajika wakajé.

Eyá chuwa, mana'í chiyó piyuke nakaje kapichako naliyá”,
ke nemájika nanaku. ²⁰Nemaja kaja:

“Mariruna i'imajeño je'echú chu:

Tupana le'ejena ina'ukena,
Jesucristo wakára'akarena,
Tupana puráka'alo ja'apátajeño, kele.

Nekajlo numá: Ipechu i'imá pu'ují,
Tupana wajákale pajimila eruna,
chapú nala'akare iká chona”.

²¹E nomá Tupana wa'atéjeri, je'echú chiyaje, jácho'otaka jipa
kajruni. Rejomi rika'á riká juni jalomi jakojé, e rimá:

“Ñaké kaja pajimila kapichájiko,
ilé nemakare nakú: 'Apú pajimila chaje riká'.
Unká kaja ri'imalaje piño.

²²Unká jataníkaje, yáleje kaje i'imalaje rewá,
reyá a'ajná ño'ojó.

Guitarra kaje nakú wara'akana,
kewirí kaje chojé apho'okana,
luwiluwí chojé apho'okana,
unká kaja i'imalaje reyá a'ajná ño'ojó.

Unká kaja nakaje nakú jápajeño i'imalaje rewá riwakajé;
unká kaja nakaje tojro'ojeño i'imalaje rewá riwakajé;

²³unká kaja nakamaré amálajo piño re.

Unká kaja nawá'akalajo pajwa'atéchaka re.
Le'ejepelaji minaná, re i'imajíkaño, chá'atajeño
ajopana le'ejepelaji minaná eja'awá chu i'imakaño.
Nakaje a'akana aú nachá'atake neká.

Kajrú nawe'epika lawícho'okaje nakojé rewá,
raú napajlake ina'uké wa'até,
napechu i'imaká piyá kaphí Tupana chojé”,

ke Tupana wa'atéjeri kemaká. ²⁴Kajrú Tupana wajájika pajimila
eruna, nenókale Tupana le'ejena ina'ukena, ripuráka'alo
ja'apátajeño wa'até. Piyuke Tupana le'ejena ina'ukena, nenókarena
eja'awá chu i'imaká, pachá riwajaje neká.

19 ¹Marí kaje ejomi, noma'á napuráka'alo ja'akó majó kaphí
wani je'echú chiyá. Íki'iruna wani ina'ukena pura'akó
mejé, ke rema'akó majó. Pajñakani nemaká:

“Pu'ují wapechu Tupana nakú, raú wapura'ajó palá rinaku,
¡Aleluya!

Riká i'imatari ina'uké kapichákajo liyá.
 Rikaja kalé we'epiri piyukeja wani nakaje la'akana nakojé.
 Palani kaja rinaku pura'akano palá.
² Nala'akare pu'uwaré lokó'opala riwajá ina'uké.
 Palá rila'aká raú.
 Kaja rikapichata pajimila eyájena.
 Napuráka'alo jimaje kajrú ina'ukena,
 eja'awá chu i'imakaño, pajno'otaño napéchuwa Tupana liyá.
 Kajrú kaja napichátaka ina'uké pechu napuráka'alo aú.
 Nenoka pachá Tupana le'ejena ina'ukena,
 Tupana pura'aró nale'ejé jakumi nakú”,
 ke nemaká. ³ E nemá piño kaphí wani marí ke.
 “Pu'ují wapechu Tupana nakú, raú wapura'ó rinaku palá,
 ¡Aleluya!
 Pajimila nemakare nakú: ‘Apú chaje riká’, ke,
 e'iyayá ija jácho'ojero.
 Ñakeja rácho'ojiko reyá”,
 ke nemaká. ⁴ E kaja veinticuatro pheñawilana, eyá pa'u kele
 kajmuruna, kele láma'año najimá aú Tupana jimaje. Ñáka'ajori chu
 riyá'ako ejé najláma'o rijimaje, e nemá:
 “Ñaké riká, pu'ují wapechu Tupana nakú,
 ¡Aleluya!”.

Tupana i'irí wá'akako yukuna marí

⁵ Re Tupana i'imaká, e'iyowá ke puráka'aloji jema'akó, rimá:
 “Tupana wátaka ke la'akáñojlo numá:
 Ipura'ó palá Tupana nakú.
 Riwátaka ke la'akaño nakiyana i'imajeño ajopana chaje;
 ajopana inakiyana i'imajeño ajopana ja'apejé.
 Iká piyukeja pura'ajeño palá Tupana nakú”,
 ke puráka'aloji jema'akó. ⁶ E noma'á piño napura'akó, íki'iruna
 wani ina'ukena pura'akó mejé, ke rema'akó nojló. Kajruni jipa
 mejé ke, pichaní mejé ke, napuráka'alo jema'akó, pajñakani
 nemaká:
 “Pu'ují wapechu Tupana nakú,
 ¡Aleluya!
 Paminá wani riká; piyuke la'ajeri kaja riká.
 Wapechu i'imakare chojé kaphí riká;
 wawakára'ajeri kaja riká.
⁷ Ñakele i'ijná, wala'achí pu'ují wapéchuwa rijló.
 Palá wapura'ajiko rinaku,

palá rila'akare weká nakú.

Chuwa riphíchaka rená chojé,

Tupana i'irí wá'akakoloje penaje;

kaja lamá'atakejami ri'iwapaniperu ripé.

⁸ Kaja ra'á rojló palá nojé a'arumakaji,

mapijaru wani i'imakare, sereni ke ramako.

Riká ra'á rojló, ro'okáloje runakuwá penaje”,

ke nemaká.

“Palá la'akaño, Tupana le'ejena ina'ukena,

ke kemakánaka riká palá nojé a'arumakaji,

ro'okare runakuwá”.

⁹ E Tupana wa'atéjeri, je'echú chiyaje, kemari piño nojló:

“Pilana'á papera kaje chojé marí: Pu'ují péchuruna neká,

Tupana kemakárena nakú, ne'emakáloje re, namákaloje Oveja i'irí wá'akako penaje”.

Tupana wa'atéjeri kemari piño nojló: “Tupana puráka'alo,

kewákaje i'imakare, nakú numíchaje pijló.” ¹⁰ E nujláma'o

ri'imá nakojé, nupechu i'imakale pu'ují rinaku, raú rimá nojló:

“Pila'aniña ilé ke. Nakaje la'ajeri nuká Tupánajlo, piká ke

kaja nuká, pinakiyana keja kaja nuká. Kaphí péchuruna iká

Jesucristo puráka'alo chojé. Pipechu i'imá pu'ujija Tupana nakú”,

ke rimaká.

“Tupana puráka'alo ja'apátajeño ja'apátaño Jesucristo

puráka'alo i'imaká. Napechu i'imakare chojé kaphí, puráka'aloji

na'apata ajopánajlo i'imaká”, ke rimaká.

Apú ja'apaka kawarú jareni nakú yukuna marí

¹¹ E nomá je'echú me'etako, re nomá pajluwaja kawarú jareni

tára'ako. Riwajlé chu nomá pajluwa yá'ako. Nakaje Rimakare

Nakú ke La'ajerí Riká, ke na'aká rií. Apú rií i'imari Kewákaje,

kewaka kemaká riká. Ilé ke na'aká rií, palá riwe'epíkale ina'uké

wajákana, pu'uwaré nala'akare pachá. Pu'uwaré la'akaño

wa'até nókajero kaja riká. ¹² Kawarú nakú ja'apájeri ijlú amaro

kera'athani ke; kajrú ripútena i'imaká riwíla'aru nakú. Rií

i'imari lana'akéjami rinaku; unká na we'epila meke ri'imaká,

rikaja kalé paminá we'epiri meke kemakánaka ri'imaká. ¹³ Kajrú

kaja jirá kaje i'imaká ra'arumaká e'iyá. Tupana Puráka'alo,

ke na'aká kawarú nakú ja'apájeri íí. ¹⁴ Íki'iruna rijwa'atéjena,

je'echú churuna suráana. Neká ja'apaño rápumichu jareruna

kawaruna nakú. Jaré nojé waja rijwa'atéjena a'arumaká i'imaká;

palani, unká pijá i'imalare e'iyá ri'imaká. ¹⁵ Nawakára'ajeri

numá chiyá jajalu kaje puwe'ení jeño'orí. Riká aú richá'ata ajopana, ajopana te'eré eruna. Riwakára'aje neká kaphí wani; namaje Tupana yuchá yajwé. Yuri wani ri'imajika najwa'até, unká pachá nema'alá ra'apiyá, kajrú riyúcha'ajiko nachá. **16** Ra'arumaká nakú, ritajné nakú wa'ató, lana'akéjami i'imaká, kemari:

“AJOPANA WAKÁRA'AJEÑO WAKÁRA'AJERI RIKÁ. PAMINÁ WANI RIKÁ.”

17E nomá Tupana wa'atéjeri, je'echú chiyaje, tára'ako kamú chu. Reyá rawíyo'o kaphí wani, piyuke wayúnajlo rimá: “Chuwa awakó, ajñákaloje a'ajnejí Tupana a'ajíkare ijló; **18** chuwa i'ijná, ajíchachi piyuke ina'ukena michuna i'imi, nawakára'ajeño michuna i'imi, suráana wakára'ajeño michuna i'imi, suráana michuna i'imi, kawaruna michuna i'imi, nanaku ja'apájeño michuna i'imi wa'ató, ajñákaloje penaje numá ijló. Mawemiru ajopana wa'até jápajeño michuna, ne'iyajena i'imaká; ajopana, ina'uké chaje i'imakaño michuna ne'emaká; ajopana ja'apejena, ne'iyajena i'imaká. Neká kajena i'imi ajñaje piyuke”, ke rimaká wayúnajlo.

19E nomá ilé kamejeri kajruni wani kaje. Piyukeja ina'ukena, eja'awá chu i'imakaño, wakára'ajeño i'imaká rijwa'até. Nale'ejena suráana i'imaño kaja re najwa'até, nenókakalaje jareni kawarú nakú ja'apájeri, rijwa'atéjena, kele wa'até penaje.

20E kaja netá ilé kamejeri kaje cha, kéchami napataká riká kemari rinakuwá: “Tupana puráka'alo ja'apátajeri nuká”, ke. Mapeja ripajlájika rinakuwá; rila'aké kaja kajrú nakaje, unká méño'oyo ajopana la'alare. Ilé kamejeri kaje awa'á rila'aké ñaké i'imajika, raú ripajlake kajrú ina'ukena wa'até. Ilé kamejeri kaje le'ejé lana'akéjami nakú i'imakárena ne'emaká, ripajlá wa'até i'imaká. Pu'ují péchuruna ne'emaká kamejeri jenami, nala'akare i'imaká nakú, keleruna wa'até ripajlá i'imaká. Napatá ilé kamejeri; napatá kaja ilé kemari rinakuwá mapeja: “Tupana puráka'alo ja'apátajeri nuká”, ke. E naka'á neká, iyamá kajmúyaja, kera'athani kajruni chojé. Kajruni kaéja ke riká, azufre aú rilukúna'o, riká chojé naka'á ne'emaká. **21** Kawarú nakú ja'apájeri kapichátari kaja najwa'atéjena suráana. Jajalu rinuma chiyá jeño'oká aú rikapichata ne'emaká. Ripuráka'alo aú ja rikapichata neká. Rejomi wayuna piyuke iphaño natami ajñaje, namano'oká ejé najñá piyukeja ne'imi

Nachá'ataka Jiñá Chi'inárikana yukuna marí

20 ¹E nomá Tupana wa'atéjeri witúka'aka je'echú chiyá. Chawi i'imari rikapi, kajrú nojé kureti wa'até. Ulawí, unká tajnáka'alo i'imalá, me'etájona ri'imaká. ²E ripatá Jiñá Chi'inárikana, na'akare íí Lánawaru, ke; jeí chi'inárikana ke nemájika kaja rinaku. Eja'awá keño'okó wakajé ri'imaká. Riká Jiñá Chi'inárikana, Satanás, ripatá, kéchami repo'otaka riká. Riyurí riká jepo'otákeja mil jarechí ketana. ³Tupana wa'atéjeri, je'echú chiyaje, ka'arí riká ulawí matajnéka'aru chojé. Reje richawína'a richá, rejomi richúta'a rinumaná. Ilé ke ritaká rapu, ripajlaka piyá ina'ukena, eja'awá chu i'imakaño, wa'até. Richu riyurejo mil jarechí ketana, rejomi je'echú chiyaje me'etaje richaya, rácho'okoloje richiyá penaje, ri'imakáloje marí eja'awá chu meketánaja.

⁴Rejomi nomá kajrú ñáka'ajori pitakó, ne'emakánana yá'akaloje richu penaje ri'imaká. Richiyá yá'ajomi nemaje ajopana ina'ukena nakú mékeka nala'akana, nakaje nala'akare i'imaká pachá. Riká penaje Tupana a'á ne'emaká. Nomá kaja ajopana ina'ukena, nenókarena, péchumi re. Jesucristo puráka'alo ja'apátajeño ajopánajlo, ajopánajlo ke, penájemi ne'emaká. Tupana puráka'alo na'apátake jimaje nenoke neká. Unká napechu i'imaké pu'ují kamejeri kaje nakú; unká kaja napechu i'imaké pu'ují renami nala'akare rinakojé nakú; unká kaja nawátake ilé kamejeri kaje le'ejé lana'akéjami i'imaká nayáthe'ela nakú, napulá nakú wa'até. Ilé kajena ne'emaká nenó i'imaká; neká penájemina makápo'oño piño. Rejomi ne'emá Jesucristo ja'apiyá wakára'ajeño mil jarechí ketana. ⁵Tupana makápo'ori piño neká, ajopana kaja taka'akaño tukumá i'imaká. Ajopana kaja taka'akaño i'imaká, unká jo'ó makápo'olaño riwakajé. Mil jarechí ja'apájika ejomi, namakápo'ojo piño napumí chuwá. ⁶Pu'ují ajopana tukumá makápo'ojeño pechu i'imajika raú, Tupana le'ejena wani ne'emajíkale, unká ne'emalaje Tupana liyá kupákejanami. Nephá wani Tupana, Jesucristo wa'até, ja'apí. Na'apiyá nawakára'aje kajrú ina'ukena mil jarechí ketana.

⁷Mil jarechí ja'apájika ejomi, Tupana wa'atéjeri, je'echú chiyaje, me'etájeri Jiñá Chi'inárikana chaya, rácho'okoloje ulawí matajnéka'aru chiyá penaje. ⁸Rejomi ri'imajé piño pajlakaje nakú. Ripajlaje piyuke ina'uké, eja'awá chu i'imakaño wa'até, ajopana wa'até, ajopana wa'até ke. Gog te'eré, Magog te'eré e i'imajíkaño wa'até ripajlaje. Chapú péchuruna Tupana nakú ne'emajika.

Jiñá Chi'inárikana awakátajeri neká, nenókakoloje penaje. Íki'iruna wani ne'emajika. ⁹Piyuke nate'eré eyájena awakájeño Israel lakénami te'eré nakoje. Netaje Jerusalén, pajimila Tupana wátakare cha, nakapichátakaloje riká penaje, e'iyonaja kera'athani ja'ajó je'echú chiyá nachá. Riká aú chapú Tupana nakú péchuruna kapichajo. ¹⁰Rejomi rika'ajé Jiñá Chi'inárikana kera'athani, azufre aú lukúna'ako, chojé. Kaéja kajruni ke riká. Ina'uké wa'até pajlájeri riká. Kaja naki'ichami richojé ilé kamejeri kaje, apú wa'até kemakeri rinakuwá mapeja: “Tupana puráka'alo ja'apátajeri nuká”, ke. Re najña'ajé rijwa'até chapú kaje yajwé panaku we'echú, eyá lapí ketana wa'até, ilé ke ne'emajika re matajnako.

**Tupana kemájika piyukeja ina'ukena nakú
meke nala'akana i'imajika yukuna marí**

¹¹E nomá pajluwaja ñaka'ajori kajruni, jareni ri'imaká, nawakára'ajerijlo penaje ri'imaká. Nomá kaja richu yá'ajero yá'ako richu. E nomá eja'awá, je'echú wa'até, kapichako sujwí keja rawa'ayá. Unká ramalo reyá a'ajná ño'ojó. ¹²E nomá kaja taka'akaño tára'ako rijimaje, ilé yá'aro nawakára'ajeri ñaka'aru chu jimaje. Piyukeja neká tára'año rijimaje; ajopana chaje i'imakaño, ajopana ja'apejé i'imakaño, kele tára'año rijimaje piyukeja. E kaja rijme'etá ripapérane, apú papera wa'até; íi i'imari lana'akéjami richu, neká i'imajeño rijwa'até matajnako. Apú kemari kaja taka'akaño nakú meke nala'akana; ripapérane chu nanaku kemakana i'imari. Meke nala'ajika, marí eja'awá chu ne'emaká wakajé, loko'opáneje rila'ajika neká palá. ¹³Juni jalomi jakú kaja taka'akaño i'imaño, neká kaja tára'año rijimaje. Kaja taka'akaño, unká jema'alaño Tupana ja'apiyá, péchumi i'imari napukuna chu, neká tára'año piño rijimaje. Neká, unká jema'alaño Tupana ja'apiyá, péchumi i'ijnari apú napukuna chojé. Re piyuke kaja taka'akaño tára'año rijimaje, rejomi rimá nanaku mékeka nala'akana. Mékeka nala'ajika marí eja'awá chu ne'emaká wakajé, loko'opáneje riwajájika neká. ¹⁴E Tupana ka'arí pu'uaré la'akaño péchumi kera'athani kajruni chojé. Richojé kaja rika'á taka'akaje. Kaéja kajruni ke riká kera'athani. Ilé kaje aú nakapichó piño Tupana liyá. ¹⁵Apú papera chu ina'uké íi i'imari lana'akéjami, nekaja kalé i'imajeño matajnako Tupana wa'até. Unká íi i'imalaje lana'akeja apú papera kaje chu, naka'ajé kajruni kera'athani chojé.

Wajé je'echú, eja'awá wa'até, yukuna marí

21 ¹Kaja je'echú, eja'awá paineko i'imakare, kapicharo; ñaké kaja juni jalomí kapichako rijwa'até. Pumí chiyó nomá wajé je'echú, wajé eja'awá wa'até. ²E nuká Juan amari Tupana le'ejé pajimila Jerusalén witúka'aka je'echú chiyá, Tupana i'imaká eyá. Nawakako wakajé, ri'iwapaniperu lamá'atayo roké palá wani ripé. Ñaké kaja riká pajimila i'imaká lamá'atakejami ke rijló. ³E noma'á apú kemaká kaphí, Tupana i'imaká eyá: “Iyaka'o, chuwa Tupana i'imajika ina'uké wa'até. Rile'ejena ina'ukénaja ne'emajika; Tupana yuréjero kaja najwa'ateja. ⁴Tupana jalákajeri nejlú chiyá nejlú jalá; unká taka'akaje i'imalaje re najló; unká kaja namálaje chapú kaje yajwé; unká kaja neyálaje; unká kaja namálaje kewini yajwé; unká ri'imalaje, júpimi ri'imaká eja'awá chu, ke”, ke rimaká.^b

⁵E yá'aro ñáka'ajori chu kemari: “Chuwa nula'ajika piño piyuke nakaje wajé”. E rimá nojló: “Pilana'á marí papera kaje chojé; kewákaje nupuráka'alo, ina'uké pechu i'imakáloje kaphí richojé penaje”.

⁶E rimá piño: “Kaja. Nuká keño'ótari piyukeja nakaje i'imaká; nuká kaja tajátajeri riká piyukeja. Núrupi chu makára'ataño, wátaño juni i'irakana. Ñaké kaja wátaño najluwa kajmuchaji, najló no'ó riká, ne'emakáloje matajnako nujwa'até raú penaje. Mapeja no'oká ina'ukejlo riká, unká riwemí i'imalá. ⁷Nuká kemari kaphí nochojé tára'ajeñojlo, ne'emakáloje nuyani ke, kaphí napechu i'imakare chojé nu'umakale. Ilé ke ri'imajika unká jácho'olajeño Nupuráka'alo ja'apiyá jema'akana chiyajlo. ⁸Eyá ajopánajlo ri'imajé chapú. Marí ke i'imakaño ne'emakale pachá, ri'imajé najló chapú: ina'uké piyá kero'ojeño, unká kaphí kalé péchuruna Tupana chojé, unká ina'ukélaruna, ina'uké nójeño, namanáicho la'ajeño ajopana wa'até, lawichú kaje la'ajeño, lejñákaje la'ajeño, pu'ují péchuruna nakaje jenami nakú, nemakare nakú: ‘wachi'inárikana riká’, ke, eyá pajlákachina. Ilé ke i'imakaño i'imajeño kajruni jiyá, azufre aú lukúna'ako chu; ilé ke nakapichájiko piño Tupana liyá”.

Wajé Jerusalén yukuna marí

⁹E pajluwaja Tupana wa'atéjeri iphari nunaku. Iyamá kuwáata kele, maapami ke nomákarena, nakiyana ri'imaká. Tiyela nakapi ke, nala'akáloje chapú eja'awá chu i'imakaño raú penaje ne'emaká.

Pajluwaja nanakiyana iphari nunaku, rimá nojló: “Pi'ijná nujwa'até, nuya'atachi pijló Oveja i'irí yajalo i'imajíkayo”.

¹⁰E Tupana wa'atéjeri wá'ari nupechu kajruni wani ipuré ejo. Yenoje ri'imaká, riká nakiyá riya'atá nojló Tupana le'ejé pajimila Jerusalén. Nomá riwítúka'aka je'echú chiyá, Tupana eyá. ¹¹Kajrú mejáma'atani Tupana le'ejé i'imaká rinaku. Jipa, kawemí nojé wani ke nomaka riká; kawemí nojé jipa íí jaspe, riká ke ri'imaká. Jamarálani, cristal ke nomaka riká. ¹²Kurara kajruni, yenuwa chipúka'ari rinakuwá, jipa nakiyá la'akanami ri'imaká. Iyamá iphata ji'imaji nakoje (12) kele rinumaná i'imaká apú eyá, apú eyá ke; iyamá iphata ji'imaji nakoje kele kaja Tupana wa'atéjena, je'echú chiyájena, tára'año rinumaná wa'aphé. Rinumaná nakú lana'akéjami i'imari; Israel lakénami a'ajútaya michuna íí i'imari lana'akéjami rinaku. ¹³Weji keleno ke rinumaná i'imaká; kamú jeño'oká ejo pitá weji kele rinumaná i'imaká; eyá ripara'alá chojé pumitá i'imari weji kele kaja; eyá apo'ojó pitá, ripara'alá chojé pumitá, weji kele kaja rinumaná i'imaká; kamú ja'akó ejo pitá, weji kele kaja rinumaná i'imaká. ¹⁴Iyamá iphata ji'imaji nakoje kele jipa pitaró kurara ja'apiwá. Jesucristo (El Cordero, Oveja i'irí) wakára'akarena íí i'imari lana'akéjami rinaku.

¹⁵Tupana wa'atéjeri, pura'akaro nujwa'até i'imaká, ña'arí pajimila wapherecha jená. Oro nakiyá la'akanami ri'imaká, rijña'akare aú rená; rijña'á kaja kurara jená, rinumaná jená wa'até. ¹⁶Rejenowaja pajimila chita i'imaká; kamíta'achi ke ri'imaká. Rená ña'ajona aú Tupana wa'atéjeri ña'arí rená: dos mil doscientos kilómetros ketana riwapherecha i'imaká; ñaketana kaja yenuka ri'imaká. ¹⁷Rijña'á kaja kurara yenuka jená: sesenta y cuatro metros ketana yenójeke ri'imaká. Ketana rená ña'akó ríle'ejé rená ña'ajona aú.

¹⁸Jipa, jaspe palá nojé nakiyá la'akanami, kurara i'imaká. Oro wani nakiyana la'akanami pajimila i'imaká, jamarálani ke ramako wíluru ke. ¹⁹Palá nojé jipa, kawemí nojé pato'oró jipa nakuwá, kurara ja'apiwá to'okó nakú. Ripalacha penaje ri'imaká, palá ramako raú. Marí kaje jipa to'oró ra'apiwá: jaspe, apú zafiro, apú ágata, apú esmeralda, ²⁰apú crisoprasa, apú jacinto, apú kaja penaje íí i'imari amatista. ²¹Re nakaje kawemí nojé wani, ríí perla; riká waja i'imari rinumaná itájona apú, apú ke. Iyamá iphata ji'imaji nakoje kele rinumaná i'imaká; pajlúwa'alano waja perla i'imaká rinumaná itájona. Pajimila e'iyowá iñe'epú to'oró, oro nakiyá la'akanami ri'imaká; jamarálani, wíluru ke ramako.

22 Unká nomala re Tupana ñakaré, ina'uké pechu i'imakáloje pu'ují rinaku richu penaje; unká na penaje ri'imalá, Tupana i'imakale re Ri'irí Jesucristo wa'até. Piyuke la'ajeri Tupana; nawakára'ajeri kaja riká. **23** Unká kaja kamú, kerí, kaje i'imalá re; unká na penaje ri'imalá, Tupana i'imakale mejáma'atani ke najló. Ri'irí i'imari nakamaré. **24** Ina'ukena, ajopana te'eré eyájena, ajopana te'eré eyájena ke, amájeño rikamaré chojé. Piyuke ajopana, ajopana ke, wakára'ajeño i'ijnatájeño nakaje palá nojé, kawemí nojé, rejo. **25** Pajimila numaná yuréjero me'etákeja we'echú ketana; unká netalaje riká, unkale lapí i'imalaje re. **26** Palá nojé nakaje ajopana, ajopana ke, kapi i'imajíkare, ne'ejnataje riká pajimila ejo. **27** Unká ne'ejnatálaje nakaje pu'uwaré nojé rejo; unká kaja pu'uwaré la'ajeño, unká ina'ukélaruna, kajena i'imalaje re; unká kaja pajlákachina i'imalaje re. Kaja Tupana lana'arí ina'uké í Ri'irí papérane chu, ne'emakáloje matajnako rijwa'até re penaje, nekaja kalé i'imajeño re.

22 **1**E Tupana wa'atéjeri ya'atarí nojló juni, kajmuchaji a'ajeri inajlo penaje. Jamarálani wani ri'imaká, cristal ke jamaraka. Tupana i'imari Ri'irí (Oveja i'irí, el Cordero) wa'até. Re ripomi i'imaká. **2** Ine'epú i'ijnari pajimila jiwami chuwá, riká ine'epú jiwami chuwá juni to'oró pe'iyowá. Iyamá pumitanó riturenó a'awaná lapa'akó. Inajlo kajmuchaji a'ajona penaje riká a'awaná i'imaká; kerí keja rarúka'ajika. Pujana ke ripaná i'imaká, ajopana, ajopana ke, i'imakáloje peyajwéruna raú penaje. **3** Unká Tupana yerúka'ala nakaje chaje riká pajimila e'iyá, palá waja nakaje i'imakale re. Tupana i'imajeri nawakára'ajeri, Ri'irí wa'até; pu'ují rijwa'atéjena pechu i'imajika nanaku re. **4** Namaje riká. Rií i'imajeri lana'akéjami napulá nakú. **5** Unká lapí i'imalaje re; unká kaja kamú i'imalaje re; unká kaja nakamaré i'imalaje re. Unká na penaje ilé kaje i'imalaje najló, Tupana i'imajíkale mejáma'atani ke najló re. Nawakára'ajeri riká, rijwa'atéjena wakára'ajeño i'imajeño kaja rijwa'até. Matajnako ne'emajika rijwa'até.

6E Tupana wa'atéjeri, je'echú chiyaje, kemari piño nojló: “Kewákaje marí puráka'aloji, iná a'akáloje iná nakojo riká penaje. Tupana a'arí Ripechu ripuráka'alo ja'apátajeñojlo; riká penájemija kaja Tupana wakára'ari nuká majó, numakáloje ra'apiyá jema'ajeñojlo mékeka ri'imajika meketana i'imajemi yukuna”, ke rimaká nojló.

7Rimá piño nojló. Jesús kemari: “Jema'á, meketana i'imajemi nuphaje ka'ajno, palani ri'imajika a'año nanakojó marí puráka'alojijlo”, ke rimaká nojló.

⁸Nuká Juan jema'arí mékeka nemaká; nomá kaja nakaje i'imajíkare ya'atakó nojló. Marí kaje aú nujláma'o Tupana wa'atéjeri ji'imá nakojé, nupechu i'imakale pu'ují rinaku. Riká ya'atarí nojló nakaje nomákare i'imaká, raú nujláma'o ri'imá nakojé. ⁹E rimá nojló: “Pila'aniña ilé ke nuká. Nakaje la'ajeri nuká Tupánajlo; piká, ke kaja nuká; Tupana puráka'alo ja'apátajeño, marí papera kaje puráka'alo a'akaño nanakojó, kele nakiyana kaja nuká. Nakele pipechu i'imá Tupana nakú pu'ují, unká nunaku kalé”, ke rimaká nojló.

¹⁰Rimá piño: “Pimicho'otániña ajopana liyá marí puráka'aloji, nakaje i'imajíkare nakú rimakale. Meketana i'imajemi ri'imajé, marí puráka'aloji kemaká ke. ¹¹Riphájika rená chojé wakajé, pu'uwaré la'ajeño i'imajeño kaja keja pu'uwaré la'ajeño; unká ina'ukélaruna i'imajeño kaja keja unká ina'ukélaruna; palá la'akaño i'imajeño kaja keja palá la'akaño; Tupana ja'apiyá i'imakaño i'imajeño kaja keja Tupana ja'apiyá i'imakaño”, ke rimaká nojló.

¹²Jesús kemari piño: “Jema'á, meketana i'imajemi nuká i'ijnajeri piño ka'ajnó eja'awá nakojé. Nujña'ajé nujwa'ató nakaje ina'uké la'akare wemí; no'ojé najló riwemí. Nakaje nala'akare loko'opáneje no'ojé najló riwemí pajluwano, pajluwano ke. ¹³Nuká keño'ótari piyukeja nakaje eja'awá chu i'imakare; nukaja kaja tajátajeri piyuke riká”, ke rimaká.

¹⁴Rimá: “Pu'ují péchuruna neká, yuriño naliyó pu'uwaré nala'akare, ne'emakáloje palá péchuruna, reyá a'ajná ño'ojó penaje. Neká ajñájeño a'awaná icha, a'arí inajlo kajmuchaji, iná i'imakáloje matajnako raú penaje; neká i'imajeño kaja pajimila, je'echú chu i'imakare e. ¹⁵Eyá marí ke i'imakaño unká i'imalájeño riká pajimila e: lejñaño, namanáicho la'ajeño ajopana wa'até, ina'uké nójeño, kele unká i'imalájeño re. Pu'ují péchuruna nakaje jenami nemakare nakú: ‘wachi'inárikana riká’, ke, unká kaja i'imalájeño re; pajlákachina, unká kaja i'imalájeño re. Ilé kajena unká i'imalájeño Tupana wa'até”.

¹⁶E rimá piño nojló: “Nuká Jesús, wakára'ari nujwa'atéjeri je'echú chiyá, ri'imakáloje nakaje i'imajíkare yukuna ijlo penaje. No'opiyá jema'ajeño awakaño apa'alá chojé, apa'alá chojé ke, nekajlo riyukuna yurejo. Nu'umaká eja'awá chu wakajé, ‘David michú lakemi riká’, ke nemájika nunaku. Iwijrí patarí lapiyami, ke nuká”.

¹⁷Tupana Pechu, Jesucristo ja'apiyá jema'ajeño, kele kemaño Jesucristojlo: “Majó pi'ijná”, ke. Imá ñaké kaja rijló, ke numaká marí puráka'aloji jema'ajeñojlo.

Núrupi chu makára'ataño wátaño juni i'irakana. Ñaké kaja iwátajika ee Jesucristo liyá kajmuchaji, ikeja'a riliyá riká, ra'achí ijló riká, raú i'imajé matajnako rijwa'até. Mapeja ra'ajika ijló riká, unká riwemí i'imalaje.

¹⁸Nuká Juan kemari marí puráka'aloji jema'ajéñojlo:

Apiyákaniña marí puráka'aloji. Unká kemalájeño richuwaja rinaku, apichátajeño kari ripuráka'aloji lana'akéjami. Pachá namaje chapú kaje yajwé rimakare nakú marí papera kaje chu.

¹⁹Unká ja'apátalajeño ajopánajlo rimakare nakú marí papera kaje chu yukuna ke kaja, unká i'imalájeño matajnako Tupana wa'até rile'ejé pajimila e. Marí papera kaje chu rimá riká pajimila nakú.

²⁰Jesucristo amari marí puráka'aloji, rimá: “Ke jo'ó riká, meketana i'imajemi nu'ujnajé ka'ajno”, ke.

“Ñaké riká. ¡Pi'ijná majó!”, ke numaká wawakára'ajeri Jesucristojlo.

²¹Nuwata piyuke iká i'imaká palá, wawakára'ajeri Jesucristo palamane aú.

Ñaké ri'imajika.